



C40-4414

了翁一座請大歲及有  
家書置武州苦雲山  
我微笑塔院祖府中永  
為學者不敢許出院內  
當山二世鐵牛機譲



B 64853

妙法蓮華經玄義卷第七上

天台 智者 大師說

近利益者起於寂滅道場始成正覺卽轉法輪擊  
於毒鼓天鼓利益衆生齊至灑華已前益亦淺深亦  
亦奢促何者教本逗緣緣略爲四教亦有四教主亦  
四皆稱法王具王三昧自破二十五有七益衆生例  
如前說又大小乘經明佛入王三昧放光說法善惡  
諸趣果苦得益者如阿含中說見佛光明蒙佛手觸  
六道苦患悉得除愈又大品云放光照地獄衆生苦  
惱卽除生齊第六天苦除是果益生天是因益大品

稱爲華葉之益也又佛放光幽闇之處皆大明各作是念此中云何忽生衆生此亦是果益此因果益四教主佛通能此益別論益者則是淺深不同謂聲聞斷正緣覺侵習同名中草菩薩伏惑兼度衆生故經云求世尊處我當作佛行精進定是名上草益蓋三藏教主慈善根力利益之相也經云若諸菩薩智慧堅固了達三界求最上乘卽二人同觀無生非但有前析智之益別有巧度卽是體真是爲小樹增長益蓋通教主利益之相經云復有住禪得神通力聞諸法空心大歡喜住禪者住九種大禪心大歡喜者登

歡喜地度無數億百千衆生是名大樹增長非但有前因果析體之益而別有分別道種智乃至一切種智益蓋別教主利益之相經云今當爲汝說最實事不啻如前之益乃有卽破無明顯出佛性究竟實益蓋圓教主利益之相復次前三教益劣不兼勝勝則兼劣可解云又歷五味者乳教但因果大樹實事四益而不明三草一木以大乘經不入二乘人手如聲如痾故鶲教但有三草等四益生蘇備有七益熟蘇無析法三草而有體法等七益醍醐但有實事益前諸益皆麤今益則妙近從寂滅訖至法華爲生身

菩薩但得八番之益不得第九第十益也又有得義者卽是菩薩從法性身來入分段作願通應生等眷屬進破無明斷除殘品卽得明第九第十番益也始從寂滅終至法華略言十益也問法身菩薩聞應身佛說法應身中益亦令法身得益耶答辭如磨鏡鏡轉明色像亦明又問應身聞法益法身亦益者應身現病法身亦病耶答此病若實者應病法亦病祇爲應病非實非實故應身無病法身亦無病又若應身現病少當知法身益亦少若能應身現病廣法身益亦廣也今作諸句料簡自有果益因不益因益果不

益俱益俱不益此卽現事可解自有壞益成益亦壞亦成益不壞不成益不壞不成益是清涼益四趣因是壞益非想因是成益中間是亦成亦壞益云自有因益卽果益果益卽因益此變易因移果易意也自有因益非增道果益非損生得是因果益不得是因果益分段報因果也自有因益是增道果益是損生不得是因果益得是因果益習因習果也自有真益非俗益二乘也俗益非真益六度菩薩也自有先俗益後真益六度菩薩也自有先真益後俗益通菩薩也自有真俗益非中益中益非真俗益別也自有

真益卽俗益亦卽中道益圓也三當文利益就今經備有七益雖復差別卽無差別辭如芽莖枝葉生長不同而是一地所生七益誠復淺深無非實相故言差別無差別也諸經差別麤益同入此經無差妙益或進入諸妙益或按位成妙益進入益者本是地上清涼今則進發大乘解心明淨或進觀行妙相似分眞中本是人天因益今進入相似分眞本是小乘學無學益今進破無明分真妙益辭如迴聲入角轉小爲大也通別進益例此可知按位益者本是麤果地上清涼即成理妙之益按於麤因之益即是觀行妙

益按麤學無學益卽是相似妙益開麤卽妙不須進入通別例此可知進入妙益卽是待麤益明妙益按位益卽是絕待妙益云諸麤益判眷屬者果因二益堪爲業生眷屬中上二草小樹等堪爲願通眷屬大樹見性已去皆應生眷屬攝云進入按位者理妙假名觀行妙堪爲業生眷屬相似妙堪爲願通眷屬分真堪爲應生眷屬是名此經利益之相也云三明流通利益者爲三一出師二出法三出益弘經行人具通凡聖若法身菩薩誓願莊嚴今此土他土下土上土得權實七益九益十益化功歸已還資法

身增道損生也生身菩薩亦能此土他土弘經令他得權實七益化功歸已增道損生而不能上土利益也凡夫之師亦能此土弘經令他得權實七益化功歸已增益品位故無量義云有病導師在於此岸而成就船筏渡人彼岸卽其義也問凡夫但能爲凡夫弘經使凡夫得益亦能令聖人得益耶答聖有二種一小乘聖二大乘聖如經云若有實得阿羅漢生滅度想若遇餘佛便得決了南岳師云初依名餘佛無明未破名之爲餘能知如來秘密之藏深覺圓理名之爲佛佛滅後實得羅漢者於權實未了若遇初依

卽能決了成相似益或進入分真益此文往證凡夫之師得爲小乘聖人弘經得益也經云六根清淨人說法十方諸佛皆樂見之皆向其處說法一切天龍聞其所說皆大歡喜此亦是凡夫師爲大聖說法之明文也二出法者通經方法明出聖言文云若衆生不信受者當於餘深法中示教利喜餘者帶方便也深者明中道也帶方便明中道者即別教也若但方便不明中道即通藏等教也經文許用別助圓而例推亦應用通助圓又文云更以異方便助顯第一義豈隔藏通耶但菩薩已得實慧亦得權意不以實濫

權亦不謂權是實但爲弘實而衆生不信須爲實施  
權以淺助深無虛妄也此則雙用權實而弘經也安  
樂行云若有難問不以小乘法答但以大乘而爲解  
說令得一切種智此則但令用實弘經也又云隨宜  
爲說此亦不隔於權也今時人弘法或一向用大或  
一向用小皆不得佛意善弘經者用與適時口雖說  
權而内心不違實法但使衆生得權實七益於弘經  
暢矣三出益者然流通利益不待第三流通段方明  
利益祇正說文中已指未來弘經之利辟喻品後授  
記品末法師品中皆明弘經功德利益能於如來滅

後聞一句偈者亦與受三菩提記況弘宣者竊爲一  
人說者功德尚多況處衆廣說者展轉至第五十人  
隨喜功德尚非二乘境界況最初會中聞隨喜者常  
不輕流通一句尚得六根清淨況具足流通者初品  
弟子弘經功德無量億劫行五波羅密不得爲喻況  
第五品十方虛空寧有邊表五品弘經尚叵窮盡皆  
云入如來室著如來衣坐如來座如來之法皆非數  
量況八萬大士千界微塵菩薩而當可說耶而當可  
知耶唯除如來無能盡知者也凡師弘經今凡七益  
經云此經是閻浮提人病之良藥若聞是經不老不

歟者於老歟中識老歟實相老歟是果報法識實相  
卽得清涼理妙益也亦果報益也能持此經故生安  
樂土處蓮華中不爲貪欲所惱亦是離十惱亂是善  
行菩薩道亦名名字益亦是觀行妙亦是脩因妙得  
陀羅尼能旋假入空卽是下中上藥草等益亦是小  
樹益得百千旋陀羅尼卽大樹益得法音方便陀羅  
尼是相似實益若有須臾間卽得究竟三菩提卽是  
真實益復次如人穿鑿高原見乾土是下中上藥草  
益見泥是小樹大樹益得水是最實益後五百歲尚  
獲此益況復今時弘經利他寧無七益耶第四觀心

者小乘明心起未動身口不名爲業大乘明刹那造  
罪殃墮無間無間是大苦報處刹那促起業處促心  
暫起重業已成況九法界而不具足若能淨心諸業  
卽淨淨心觀者謂觀諸心悉是因緣生法即空即假  
卽中一心三觀以是觀故知心非心心但有名知法  
非法法無有我知名無名卽是我等知法無法卽涅  
槃等此解起時於我我所如雲如幻卽是地上清涼  
益信敬慤愧諸善心生於空假中意而有勇卽是因  
益念念與卽空相應是中土草小樹等益念念與卽  
假相應是大樹益念念與卽中相應是最實事益於

一念益心七種分別云夫一向無生觀人但信心  
益不信外佛威加益此墮自性癡又一向信外佛加  
不内心求益此墮他性癡共癡無因癡亦可解自性  
癡人眼見世間牽重不前者傍力助進云何不信罪  
垢重者佛威建立今觀慧得益耶又汝從何處得是  
無生內觀耶從師耶從經耶從自悟耶師與經即是  
汝之外緣若自悟者必被冥加汝不知恩如樹木不  
識日月風雨等恩又三事汝不知外加一不信教二  
不自行求外加三不教人直是汝之不信非無外益  
也經曰非內非外而內而外而內故諸佛解脫於心

中求而外故諸佛護念云何不信外益耶云他共

云他

無因癡例可解卽假故無自性卽空故無他性卽中

故無共性雙照故無無因性云第五結成權實者

云五

光宅云照三三之境爲權照四一之境爲實今不用

此解旣以大乘果爲大理何不用小乘果爲小理彼  
救云小果非真故不以其果爲理若爾權教及權行

人何嘗是實旣立權教行人何不立權理又權若無  
理俗不應稱諦旣言俗諦權不應止三也實有四者  
夫因果是二法云何以二法爲理一耶經云觀一切  
法如實相不行不分別云何分別因果爲理一若爾

便無實相則魔所說故不用彼釋今明照十麤之境爲權照十妙之境爲實十麤者卽前九法界三因緣等諸麤諦智乃至麤利益皆稱權也照十妙者卽是理妙乃至利益妙妙故爲實復次爲十妙故開出十麤如爲蓮故華意在於蓮而蓮隱不現於餘深法示教利喜餘法有實而實不顯文云如來方便意趣難解也又華開蓮現辟開十麤顯十妙則無復十麤唯一大事不可思議境界乃至利益肇師云始從佛國終法供養皆明不可思議今亦例爾旣開麤已始終皆妙又約五味者乳味則有爲十妙明十麤開十麤

顯十妙則成一權一實若就四悉檀則有六權二實若約四門則十二權四實也若約三藏一向是權化城楊葉還就三藏約化他爲權就自行爲實約四悉檀三權一實約四門十二權四實若方等旣備有四教故三十種權一十種實若約四悉檀十四權二實對四門五十六權八實若約摩訶般若旣廢三藏但用三教通別二十種爲權一十種圓爲實若約悉檀十權二實若歷四門四十權八實若至法華前來一向皆廢但說一實實中非無方便但是實相方便同稱爲實今約悉檀者未悟之前三權悟卽一實若歷

四門十二權四實名數一往同三藏而意有天懸而地殊彼教十二權四實一向是權法華一向是實料簡異方等般若云故云但說無上道示真實相此之謂也若約涅槃涅槃備釋四教亦是三十權一十實一往似同方等而意迥異彼則二入實三不入實今涅槃四俱入實因中則有三權一實在果則四實而無權若約四悉檀十四權二實歷四門五十六權八實若更約三因門五十六權若果門四實但是實仍其本因故說四耳是則四門入實約果四實十二權法華義齊也故知諸教雖同有權實權實不同或

一向實或一向權或權實相兼皆是稱當機情緣理未融今總就教判權實若約三藏通別三教是權圓教爲實又諸教權實未融爲權既融開權顯實爲實今法華是一圓故爲實又開權故爲實若就圓教爲語照前三教三十麤爲權照十妙爲實若就開權圓融爲語決於三十麤皆成妙但稱爲實是故稱妙若取悟理者理卽非權非實不見一法空拳詎小兒說權說實是則爲麤理則非權非實是故爲妙也○第二約本明十妙者爲二先釋本迹二明十妙釋本迹爲六本者理本卽是實相一究竟道迹者除諸法實

相其餘種種皆名爲迹又理之與事皆名爲本說理  
說事皆名教迹也又理事之教皆名爲本稟教脩行  
名爲迹如人依處則有行跡尋跡得處也又行能證  
體體爲本依體起用用爲迹又實得體用名爲本權  
施體用名爲迹又今日所顯者爲本先來已說者爲  
迹約此六義以明本迹也一約理事明本迹者從無  
住本立一切法無住之理即是本時實相真諦也一  
切法即是本時森羅俗諦也由實相真本垂於俗迹  
尋於俗迹卽顯真本本迹雖殊不思議一也故文云  
觀一切法空如實相但以因緣有從顛倒生云二

理敎明本迹者卽是本時所照二諦俱不可說故皆  
名本也昔佛方便說之卽是二諦之教教名爲迹若  
無二諦之本則無二種之教若無教迹豈顯諦本本  
迹雖殊不思議一文云是法不可示言辭相寂滅以  
方便力故爲五比丘說三約教行爲本迹者最初稟  
昔佛之教以爲本則有脩因致果之行由教詮理而  
得起行由行會教而得顯理本迹雖殊不思議一也  
文云諸法從本來常自寂滅相佛子行道已來世得  
作佛云四約體用明本迹者由昔最初脩行契理  
證於法身爲本初得法身本故卽體起應身之用由

於應身得顯法身本迹雖殊不思議一文云吾從成  
佛已來甚大久遠若斯但以方便教化衆生作如此  
說五約實權明本迹者實者最初久遠實得法應二  
身皆名爲本中間數數唱生唱滅種種權施法應二  
身故名爲迹非初得法應之本則無中間法應之迹  
由迹顯本本迹雖殊不思議一也文云是我方便諸  
佛亦然六約今已論本迹者前來諸教已說事理乃  
至權實者皆是迹也今經所說久遠事理乃至權實  
者皆名爲本非今所明久遠之本無以垂於已說之  
迹非已說迹豈顯今本本迹雖殊不思議一也文云

諸佛法久後要當說真實若約已今論本迹者指已  
爲迹攝得釋迦寂滅道場已來十麤十妙悉名爲迹  
指今爲本總遠攝最初本時諸麤諸妙皆名爲本若  
約權實明本迹者指權爲迹別攝得中間種種異名  
佛十麤十妙皆名爲權指實爲本攝得最初十麤十  
妙悉名爲實若約體用明本迹者指用爲迹攝得最  
初感應神通說法眷屬利益等五妙指體爲本攝得  
最初三法妙也若約教行爲本迹者指行爲迹攝得  
最初行妙位妙指教爲本攝得最初本時智妙若理  
教爲本迹者指理爲本攝得本初之境妙指教爲迹

攝得本時之師教妙兼得本師十妙若理事爲本迹者指事爲迹攝得本時諸龐境指理爲本攝得本時諸妙境最初之本爲本但本而非迹最後已說但迹而非本中間亦迹亦本若無本時之本不能垂得中間最後之迹若無已說之迹不能顯得今說之本本迹雖殊不思議一也△二明本十妙者一本因妙二本果妙三本國土妙四本感應妙五本神通妙六本說法妙七本眷屬妙八本涅槃妙九本壽命妙十本利益妙釋此十妙又爲十重一略釋十意二生起次第二明本迹開合四引文證成五廣解六三世料簡

七論麤妙八結成權實九利益十觀心○一略釋者本因妙者本初發菩提心行菩薩道所脩因也若十六王子在大通佛時弘經結緣皆是中間所作非本因也若娑婆爲墨東行千界方下一點點不點等盡抹爲塵一塵一劫復過於是百千萬億那由他劫彌勒補處以出假種智直數世界尚不能知況數其塵寧當得盡特是如來巧喻顯其長遠之相況以世智巧歷算數耶文云我以佛眼觀彼久遠猶若今也唯佛能知如此久遠皆是迹因非本因也若畱中間之因於後難信是故法華拂迹除疑權而非實我本行

菩薩道時不在中間過是已前所行道者名之爲本  
卽是本因妙也二明本果妙者本初所行圓妙之因  
契得究竟常樂我淨乃是本果不取寂滅道場舍那  
成佛爲本果也尚不取中間之果以爲本果況舍那  
始成云何是本但取成佛已來甚大久遠初證之果  
名本果妙也三本國土者本旣成果必有依國今旣  
迹在同居或在三土中間亦有四土本佛亦應有土  
復居何處文云自從是來我常在此娑婆世界說法  
教化按此文者實非今日迹中娑婆亦非中間權迹  
處所乃是本之娑婆卽本土妙也四本感應者旣已

成果卽有本時所證二十三昧慈悲誓願機感相  
關能卽寂而照故言本感應也五本神通者亦是昔  
時所得無記化化禪與本因時諸慈悲合施化所作  
神通駭動最初可度衆生故言本神通也六本說法  
者卽是往昔初坐道場始成正覺初轉法輪四辯所  
說之法名本說法也七本眷屬者本時說法所被之  
人也如下方住者彌勒不識卽本之眷屬也八本涅  
槃者本時所證斷德涅槃亦是本時應處同居方便  
二土有緣旣度唱言入滅卽本涅槃也九本壽命者  
旣唱入滅則有長短遠近壽命也十本利益者本業

願通應等眷屬八番十番饒益者是也。○二生起者此十種義赴緣直說散在經文今欲編次故須生起所以本因居初者必由因而致果果成故有國極果居國卽有照機機動則施化施化則有神通神通竟次爲說法說法所被卽成眷屬眷屬已度緣盡涅槃涅槃故則論壽命長短長短之壽所作利益乃至佛滅度後正像等益義乃無量止作十條收束始終復成次第也。○三迹本同異者迹中因開而果合習果報果爲三法妙也本中因合而果開開習果出報果明本國土妙也作此同異者依於義便互有去取

述中委悉明境智行位本文語略通束爲因妙得意知是開合耳果妙者卽是迹中三軌妙也感應神通說法眷屬名同上也本開涅槃壽命妙者久遠諸佛如燈明迦葉佛等皆於法華卽入涅槃義推本佛必是淨土淨機又往事已成故開出涅槃等妙也迹中無此二義者釋迦雖於法華唱言涅槃而未滅度此事方在涅槃故迹中不辨利益同上也。○四引文證者不遠索他經亦不通引部內但就本門證成十義也然先佛法華如恒河沙阿閦婆偈今佛靈山八年說法胡本中事復應何窮真丹邊鄙止聞大意人見

七卷謂爲小經胡文浩博何所不辨今就數紙之內  
十證宛然文云我本行菩薩道時所成壽命今猶未  
盡者卽是本之行因妙也文云我實成佛已來無量  
無邊億那由他又云我實成佛已來久遠若斯但以  
方便教化衆生作如此說卽是本果妙也文云我於  
娑婆世界得三菩提已教化示導是諸菩薩又云自  
從是來我常在此娑婆世界說法教化亦於餘處導  
利衆生此之國土非復今時娑婆卽本國土妙也文  
云若有衆生來至我所我以佛眼觀其信等諸根利  
鈍此卽本時照機之智是感應妙也文云如來祕密

神通之力又中間文云或示己身或示他身或示己  
事或示他事卽是垂形十界作種種像驗本亦然是  
本神通妙也文云是諸菩薩悉是我所化令發大道  
心今皆住不退脩學我道法又中間或說己事或說  
他事驗本亦然卽本說法妙文云此諸菩薩身皆金色  
色下方空中住此等是我子我從久遠來教化是等  
衆卽本眷屬妙也文云又復言其入於涅槃如是皆  
以方便分別又云今非實滅而便唱言當取滅度往  
緣旣訖而唱入滅中間旣唱涅槃例本亦有涅槃卽  
涅槃妙文云處處自說名字不同年紀大小年卽

壽命大小卽長短常無常也中間旣爾本壽亦然卽本壽命妙也文云又以方便說微妙法能令衆生發歡喜心卽中間利益又云聞佛說壽命劫數長遠如是無量無邊阿僧祇衆生得大饒益卽迹中之益迹與中間旣爾例本亦然卽是本利益妙也十據在經非人造也○五廣釋者夫非本無以垂迹若能解迹則亦知本爲未解者更重分別但本極法身微妙深遠佛若不說彌勒尚闇何況下地何況凡夫雖然父母之年不可不知如來功德何容不識今略依經旨髮鬚推尋本因妙者經言我本行菩薩道時所成壽

命者慧命卽本時智妙也我本行者行是進趣卽本行妙也菩薩道時者菩薩是因人復顯位妙也一句文證成三妙三妙卽本時因妙非迹因也迹因多種或言昔爲陶師值先釋迦佛三事供養藉草然燈石蜜漿發口得記父母名字弟子侍人皆如先佛卽是初阿僧祇發心旣不明斷惑知是三藏行因之相也或言昔爲摩納值然燈佛五華奉散布髮掩泥躍身虛空得無生忍佛與受記號釋迦文大品亦云華嚴城內得記義與此同並云斷惑故知通佛行因之相也或言昔爲寶海梵志刪提嵐國寶藏佛所行大精

進十方佛送華供養旣爲寶藏佛父又是彌陀之師稱其功德不可思議故知是別圓行因之相以三義故知此諸因悉是迹因一近故二淺深不同故三被拂故今世已前本來已後中間行行悉是方便故知是迹因也若執迹因爲本因者斯不知迹亦不識本如不識天月但觀池月若光若桂若輪準下知上光辟智妙桂辟行妙輪辟位妙若識迹中三妙拂迹顯本卽知本地因妙如撥影指天云何臨盆而不仰漢嗚呼聾駢若爲論道耶若得斯意迹本非本本迹非迹本迹雖殊不思議一也問經稱本行菩薩道時者

應是初住得真道時也中間應是諸地增道損生今之寂場應是妙覺妙覺顯本應指昔初住此一途爲允答文義不可文云盡行諸佛所有道法又云具足行諸道悉具足因乃是本因初住不得稱悉具故非所指本因也又中間之果悉拂是權況今寂場之果何得爲實又中間之果尚被拂者中間之因寧實因也故爾問非也二明本果妙者經言我成佛已來甚大久遠我者卽真性軌佛者覺義卽觀照軌已來者乘如實道來成正覺卽是起應資成軌也如此三軌成來已久卽本果妙也本果圓滿久在於昔非今迹

成迹成又非一種或言道樹草座三十四心見思俱  
斷朗然大悟覺知世間出世間一切諸法名之爲佛  
唯有此佛無十方佛三世佛者悉是他佛非我分身  
此卽三藏佛果相也或言道樹天衣爲座以一念相  
應慧斷餘殘習氣而得成佛大品中說共般若時十  
方有千佛現問難人皆字須菩提釋提桓因等亦是  
他佛非我分身此卽通佛果成相也或言寂滅道場  
七寶華爲座身稱華臺千葉上一一菩薩復有百億  
菩薩如是則有千百億菩薩十方放白毫及分身光  
白毫入華臺菩薩頂分身光入華葉菩薩頂此名受

法王職位窮得諸佛法底而得成佛華臺名報佛華  
葉上名應佛報應但是相關而已不得相卽此是別  
佛果成相也或言道場以虛空爲座一成一切成毗  
盧遮那徧一切處舍那釋迦成亦徧一切處三佛具  
足無有缺減三佛相卽無有一異法華八方一一方  
各四百萬億那由他國土安置釋迦悉是遮那普賢  
觀云釋迦牟尼名毘盧遮那此卽圓佛果成相也有  
三義故知此諸果皆是迹果一今世始成故二淺深  
不同故三拂中間故若是本果何得今日始成本果  
一果一切果何得前後差別不同自從今世之前本

成之後百千萬億行因得果唱生唱滅悉是中間佛爲方便寂滅樹王何得非迹若執迹果爲本果者斯不知迹亦不識本從本垂迹如月現水拂迹顯本如撥影指天當撥始成之果皆迹果指久成之果是本果也如此解者中間果疑颯然皆盡長遠之信其義明焉迹本非本本迹非迹迹本雖殊不思議一也三本國土妙者經云自從是來我常在此娑婆世界說法教化亦於餘處導利衆生娑婆者卽本時同居土也餘處者卽本時三土也此指本時真應所栖之土非迹中土也迹中明土又非一途或言統此三千百

億日月者同居穢土也或言西方有土名曰無勝其土所有莊嚴之事猶如安養者同居淨土也或言華王世界蓮華藏海者此實報土也或言其佛住處名常寂光者卽究竟土也寂光理通如鏡如器諸土別異如像如飯業力所隔感見不同淨名云我佛土淨而汝不見此乃衆生感見差別不關佛土也若言今此三界皆是我有諸土淨穢調伏攝受皆佛所爲辟如百姓居土土非其有如父立舍父去舍存如來亦爾爲衆生故而取佛土化訖入滅佛去土存此乃佛土不關衆生也復次三變土田者或是變同居之穢

令見同居之淨或見方便有餘淨例如壽量云若有深信解者見佛常在者閻崛山共大菩薩聲聞衆僧者是也或見實報淨例如見娑婆國土皆紺琉璃純諸菩薩卽其義也或見寂光等也法華三昧之力使見不同耳有三義故得知諸土悉迹土也一今佛所栖故二前後脩立故三中間所拂故若是本土非今佛所栖今佛所栖卽迹土也若是本土一土一切土不應前後脩立深淺不同今土已前本土已後皆名中間中間悉稱方便況今之土寧得非迹從本垂迹執迹爲本者此不知迹亦不識本今拂迹指本本時

所栖四土者是本國土妙也迹本非本本迹非迹非  
所本卽不思議一也四本感應妙者經云若有衆生來至我所我以佛眼觀其信等諸根利鈍衆生來至者感扣法身也我以佛眼觀者慈悲往應也諸根利鈍者十法界冥顯欣厭不同也此指本時證二十三昧感應非迹中感應也迹應多種或言一日三時入定觀可度機此三藏佛照分段穢國九法界機析空感應也或言卽俗而真不須入出任運能知此通佛照分段淨國九法界機體空感應也或言用王三昧歷別照十法界機此別佛照方便有餘土次第

感應也或言王三昧一時照十法界機此圓佛照十法界寂光土機圓感應也有三義故知諸感應迹而非本始成故不同故被拂故寂場樹下始偏圓滿故知是迹或前脩後學深淺不同故知是權中間已來拂皆方便寧非迹耶從本出迹豈可執迹爲本拂迹顯本宜捨迹指本本迹迹本不思議一云復次或本感麤迹感妙或本感妙迹感麤俱妙俱麤應亦如是又本感廣迹感狹或迹感廣本感狹俱狹俱廣應亦如是但取今昔判本迹不約麤妙廣狹也云五本神通妙者經言如來祕密神通之力又云或不似

身他身示已事他事示已身已事者圓神通也示他身他事者偏神通也祕密者妙也若偏若圓皆是妙也此指本時神通非迹神通也迹通多種或言依背捨除入十四變化獲得六通過外道勝二乘此乃三藏佛通也或言依體法無漏慧獲得六通勝依背捨者此通佛神力也或言束前六通爲五依中道發無漏通此六是別佛通也或言中道無記化化禪具六通一切變化不起滅定現諸威儀語默不相妨動寂無二理又如今經中六瑞變土等皆是圓佛通也以三義故推諸神通迹而非本始獲近脩拂疑等如上

說又四句料簡亦如上然從本垂迹迹則非本拂迹顯本宜棄迹指本本迹迹本不思議一也六本說法妙者經言此等我所化令發大道心今皆住不退我所化者正是說法令發大道心者簡非小說也此指本時簡說非述說也述說多種若依涅槃明初後兩味從牛而出若以義推中間三味亦應從牛而出何者凡犢噉凡草但能出乳不噉忍草故不出四味良犢調善不高不溼酒糟麥麩五味圓滿具足在牛但聽飲噉隨擊而出若噉凡草擎卽出乳噉下忍草擎卽出酪噉中忍草擎出生蘇噉上忍草擎出熟蘇噉

上上忍草擎出醍醐若牛出五味辟漸法也牛出醍醐辟頓法也牛出三味辟不定法也佛亦如是偏圓滿足在佛心中聽機扣擊說則不同善趣機擊出人天法輪析法機擊出二乘法輪體法機擊出巧度法輪歷別機擊出漸次法輪圓頓機擊出無作法輪又兩機擊出第四第五味又一機擊出第二味又四機擊出四味除第一味又三機擊出二味除第一第二味又一機擊出第五味除四味復次三藏道場所得法如乳在牛起道場卽說乳法輪通佛道場所得法如酪在牛起道場卽說酪法輪別佛道場所得法如

五味俱在牛道場起說次第五味法輪圓佛道場所  
得法如醍醐在牛道場起卽說醍醐法輪問大經云  
如食乳糜更無所須應是乳法輪荅乳有多種麤牛  
出乳乳則爲害善犢之乳是乳最良問乳旣多種醍  
醐不一荅經以羅漢支佛爲醍醐故知優劣此中大  
有義宜熟思之例三義往推上諸說法迹而非本始  
滿始說中間被拂中間滿中間說尚皆方便況今滿  
今說寧非迹耶執迹則俱失拂迹則俱解非迹非本  
不思議一也復次已說爲迹今說爲本已本今迹俱  
述俱本云或實本權迹四句云體用乃至事理

四句

云

妙法蓮華經玄義卷第七下

天台

智者

大師說

○七本眷屬妙者經云此諸菩薩下方空中住此等  
是我子我則是父下方者下名爲底大品有諸法底  
三昧釋論云智度大道佛窮底當知此諸菩薩隣佛  
窮智度底虛空者法性虛空之寂光也從本時寂光  
空中出今時寂光空中者不識本時  
者故言我經遊諸國乃不識一人地湧千界皆是本  
時應眷屬也所以無三者時節既久權轉爲實但一  
無三或可舉一例知有三也從本垂迹迹中始成佛

時亦有業願通應中間所化亦有四種文殊觀音調達等或稱爲師或稱弟子於惑者未了若拂中間無非是迹則迹本可解若執迹疑本二義俱失上云問迹本相望千界塵則少增道數則多本迹法身淺深異耶答法身先滿無增無減約化緣廣狹耳下云問初住二住化緣多少法身亦應無淺深答菩薩位未窮約實證判淺深佛位已滿但約權化有四句論廣狹上云問明因果等皆約迹佛指本明眷屬而召本到迹何耶答因果等法幽微難曉故約此指彼眷屬是人召證爲易或可將本人示迹人或將迹法顯本

灑互現意耳入本涅槃妙者經又復言其入於涅槃非實滅度而便唱言當取滅度非實滅度者常住本寂也唱言滅度者調伏衆生也悉本時涅槃非迹涅槃者大經明聲光所集始諸弟子終于蠻蠻無邊身菩薩弟子之位身量無邊豈有大師倚卧背痛此乃生身示病示滅法身無疾常存不變或取析空因滅果亡明有餘無餘涅槃或取體法空因滅果亡明有餘無餘涅槃生身迹滅者如阿含中結業之身父母所生棄國捐王六年苦行三十四心斷結成道八十二歲老比丘身詣純陀舍持鉢乞食食檀耳羹食

訖說法果報壽命中夜而盡入無餘涅槃以火闍毘  
取舍利者此三藏涅槃相若釋論云六地菩薩見  
思已盡七地去誓扶餘習受生从身乃至上生下降  
一念相應慧斷習成佛可度衆生緣盡息化入無餘  
涅槃此通佛涅槃相也若地人云緣脩顯真脩菩提  
果滿成大涅槃亦稱爲方便淨涅槃大經云因滅是  
色獲得常色受想行識亦復如是是名色解脫受想  
行識解脫乃是分段變易因盡獲常住有餘涅槃兩  
處陰果身盡獲常住無餘涅槃此與前異是別佛涅  
槃相也大經云大般涅槃常住不變能建種種示現

調伏衆生如首楞嚴廣說名大涅槃常樂我淨此與  
前異卽圓涅槃相也經曰今日座中無央數衆各見  
不同或見如來入涅槃或見如來住世一劫減一劫  
或見如來住世無量劫或見丈六身或見小身大身  
或見報身坐蓮華藏世界海爲百千億釋迦牟尼佛  
說心地法門或見法身同於虛空無有分別無相無  
礙徧同法界虛空或見此處娑羅樹林悉是土砂草  
木石壁或見此處金銀七寶清淨莊嚴或見此處三  
世諸佛所遊之處或見此處卽是不可思議諸佛境  
界真實法體此明佛身依正各有四相卽前四涅槃

相也大經與此經義同大經以常住爲宗迦葉初問長壽佛答中處處多顯未來常住少明先成壽命爲法華已說故彼經雖一兩處說不可判爲近成短命今經正明發迹顯本無量壽命爲宗小說未來常住雖一兩處少說不可判爲無常二經互舉利根知本常未來亦常解未來長壽亦解本來長壽其義是同又此經數數現生現滅者生非實生滅非實滅常住義顯又二萬燈明迦葉皆不說涅槃抵於法華明本常未來常彌見法華明常義顯云以三義故知諸涅槃迹而非本今始入故入復出故拂中間故此迹

涅槃皆從本垂云何執迹謂言是本是不識迹本也若拂迹顯本則二義不迷非迹非本不思議一也九本壽命妙者上因妙中以智慧爲命此則非長非短由非長非短之慧命能爲長短此中正明長短壽命經處處自說名字不同年紀大小年紀者是壽命也大小者長短也經中間處處年紀大小者約迹而懸指本也迹不同者三藏佛父母生身八十二盡身灰智滅畢竟不生通教佛誓願之身化緣若訖亦歸灰斷滅已不生此兩佛但齊業齊緣不得非長非短之慧命不能作長作短大小之壽命也別教登地破無

明得如來一身無量身一身湛然安住無量身百界作佛亦示九界身得論年紀大小大卽大乘常壽小卽小乘無常之壽也圓教登住時亦如是此等皆因中菩薩非常非無常能作常無常大小之壽況後心乎況妙覺乎如此等壽三義皆迹中因果之壽此壽皆從本地因果圓滿而垂此迹迹旣如此況復本也經我本行菩薩道時所成壽命今猶未盡指於本因因壽尚未盡況本果壽若執迹則不知本今拂迹則識本亦識不思議一也十釋本利益妙者文云皆令得歡喜歡喜卽利益相若迹中三乘共十地別十地

開權顯實按位妙入位妙如是等益乃至聞壽命增道損生皆是迹中益也乃至中間權實之益亦是迹益以迹望本本亦應有偏圓利益所以下方菩薩皆住虛空者皆居寂光本益也故本本以垂迹借迹以知本不復具記也○第六約三世料簡者文云如來自在神通之力如來大勢威猛之力如來師子奮迅之力卽是三世益物之文若過去最初所證權實之法名爲本也從本證已後方便化他開三顯一發迹顯本者還指最初爲本中間示現發迹顯本亦指最初爲本今日發迹顯本亦指最初爲本未來發本顯

迹亦指最初爲本三世乃殊毘盧遮那一本不異如  
百千枝葉同趣一根云問現見無量佛悉是釋迦  
分身爲當猶有餘佛餘佛復有分身不答普賢觀云  
東方有佛名曰善德彼佛亦有分身諸佛若爾亦有  
諸佛諸佛亦有分身又神力品云彈指聲歎是二音  
聲徧至十方諸佛世界彼佛四衆逕伸供養所散諸  
物從十方來譬如雲聚徧覆此間諸佛之上故知有  
諸佛諸佛亦有分身也問三世諸佛皆有分身者云  
何復言多寶如來全身不散如入禪定若全身不散  
云何復言遊於十方證法華經二意云何通答釋論

解念佛中云多寶無人請說法便入涅槃後化佛身  
及七寶塔證法華經若從論釋乃是化作全身非無  
分身也師云若言不得說法那告四衆我滅後起一  
大塔非都不說法應是不說法華故發大誓願不碎  
生身之骨全身不散出證圓經如入禪定者表於不  
滅出證常經表於不偏不偏不滅圓常義顯口唱真  
淨大法真是常略舉二德我樂可知鈍者讀文猶自  
不覺也問三世諸佛皆顯本者最初實成若爲顯本  
答不必皆顯本今作有義者最初妙覺指初住爲本  
若初住被加作妙覺亦指初住爲本初住之前豎無

所指橫有體用卽指體豈非本耶又發願故說壽長遠如文云又解最初之佛雖無長遠已今權實等本迹之可顯而有體用教行理教事理等本迹之可顯云若作無義若最初始成佛旣始得本未論垂迹無久迹可發無久本可顯云若久成佛如釋迦之例以東方爲譬若久此者卽以四方爲譬又久者十方爲譬若近此者則減東方爲譬若都無者則無所譬云問若實初成無久本可顯云何經言是我方便諸佛亦然答雖無長久之本若須用方便者佛有延促劫智能演七日爲無量劫義云問佛若有

久成始成有發迹不發迹亦應有開三顯一不開三不顯一耶答若菩薩聲聞共爲僧者則有開三顯一若純菩薩爲僧者何須開顯耶問若不開三顯一五佛章云何答同是聲聞菩薩共爲僧出五濁世可如此出淨土佛則不然問破十麤顯十妙則無明惑盡一實理彰今更破迹妙爲麤顯本爲妙破何惑顯何理答無明重數甚多實相海深無量如此破顯無咎又問若爾還以妙破妙所破之妙妙而更麤亦應還以麤破麤所破之麤例更是妙所破四住例亦應妙答就頓明義祇四住卽是於妙況破四住智寧非妙

耶又問若爾但有頓義應無漸義答若分漸頓漸之能所俱麤頓之能所俱妙云問中間有偏圓權實而同稱是權者亦應同稱爲偏耶答通義則爾別義不然偏圓約法法則已定故偏非圓圓非偏權實約教迹中施設同皆是假故就假論權耳問既有帶麤妙復有不帶麤妙亦應有帶妙麤不帶妙麤答此應四句帶麤妙卽別教也不帶麤妙卽圓教也帶妙麤卽通教也不帶妙麤卽三藏也又帶麤妙如通不帶麤妙如圓亦帶麤亦不帶麤如別非帶非不帶如圓接別如圓別接通又約五味麤不帶妙如酪妙不帶

麤如醍醐亦帶麤亦不帶麤如生熟蘇非帶麤非不帶麤如乳云問二麤既不同那忽同呼爲麤答事有淺深故爲二俱非妙理故同是麤問應帶方便實不帶方便實答例問亦應有帶二一不帶二一答例通論本迹祇是權實別論高下宜用本迹橫論真僞宜用權實本迹約身約位權實約智約教云問本地十妙約六重本迹攝屬何耶答非已今非中間乃是體用教行理教等共論十妙也○第七判麤妙者若迹中已得十麤爲麤十妙爲妙未開十麤爲麤開十成妙具如前說迹中若待麤妙若開麤妙此妙不

異本妙而言始得始得爲麤本中先成若麤若妙若開麤妙亦不異迹妙而是先得先得稱妙又迹中事理始得爲麤本中事理先得爲妙迹中理教教行體用權實等亦如是又若未發迹顯本者但解迹中事理之麤妙終不能解本中之事麤況解本中之理妙彌勒尚不達何況餘人若發迹中之事理卽顯本中之事理亦知由本中之事理能垂迹中之事理迹既由本則本妙迹麤既有本迹之殊故言麤妙妙理則非迹非本不思議一也理教教行體用權實已今等亦如是○第八明權實者照迹中十麤之境爲權照

迹中十妙之境爲實乃至中間三世所照十麤之境爲權十妙之境爲實若權若實悉皆是迹迹故稱權如是中間無量無量不可說節節權實餘經尚無中間一畠之權況一畠之實尚無中間一畠權實況無量畠尚無中間權實況有本地權實中間權實皆名爲權本初照十麤十妙皆名爲實迹權本實俱不思議不思議卽是法性法性之理非古非今非本非迹非權非實但約此法性論本迹權實麤妙耳但以世俗文字有去來今非謂菩提有去來今也復次分別權實則有三種謂自行化他自行化他具如境妙中

說本地自行所契權實二智名佛自行權實從本已來乃至鹿苑種種方便隨他意語說此二智迴轉無方名佛化他權實二智化他雖有二種皆名爲權自行雖二種皆名爲實是名自行化他合說權實復次迹中約實施權意在於實而實意難測何者化城是權而人作實解是不識權亦不知實若廢權顯實意在於權權則易測何者既知化城一事是佛權施則偏達恒沙佛法遠通久劫方便故華嚴中明爲阿鞞跋致多明事數卽其義也若開權顯實者達事法已權意卽息亦不離權遠求於實權卽是實無復別權

故言開權顯實也迹中旣有三意如此迹由本垂本亦如是本迹雖殊不思議一也云○第九利益者前明生身益次明法身益生身兩處得益迹門會三歸一開權顯實生身菩薩得利益者於十妙中得五妙益何者境妙則通一切具有乘妙則別究竟在佛感應神通說法皆是果上之益若未證果不論此益若於六卽位中得四卽益理卽究竟卽例如前但得名字卽中智行位眷屬功德乃至分真卽中智行位眷屬功德如身子得記四衆天龍歡喜說偈云大智舍利弗今得受尊記我等亦如是悉當得作佛卽是

生身菩薩聞迹門說法得益之相也發本顯迹說佛壽長遠觀佛三昧得大增長從此亦有生身菩薩得十妙中之五益六卽中之四益損生增道云云從二住去至一生在皆是法身得五益何以故應生聞本地功德觀佛三昧轉更深廣不可稱量不比前來迹中之益何者佛境轉深功德亦大故分別功德品云佛說希有法昔所未曾聞世尊有大力壽命不可量說得法利者歡喜充徧身或住不退地或得陀羅尼卽是生法二身得益之相若論實道得益兩處不殊而權智事用不得相比喻如慧解脫俱解脫無漏不

二而功德優劣前述門得道止齊無生法忍本門得道齊餘一生在以塵爲數多少深淺豈同於前當揀彼文從發心處卽是六根淨位乃至一生在卽是最後分真云又流通利益者前流通迹門是諸發誓菩薩及諸羅漢得授記者此土他土弘經論其功德觀文但明冥利不說顯益今說本門付囑一切諸佛所有之法兼得迹門法也秘奧之藏卽是本迹中實相也一切甚深之事卽是本迹中因果也如此等法付囑千世界微塵菩薩法身地弘經何但如生身此土他土弘經耶十法界身遊諸國土則有冥顯兩益

也疑者云法身常有佛何須菩薩弘但弘之在人待時侍伴如佛雖在世而文殊入龍宮法身處雖有佛復須外緣故佛付囑吐舌摩頂種種相貌殷勤付囑令弘此法得無量微妙功德其有聞者妙益不可稱數故文云若有聞佛說壽量一切皆歡喜得無量無漏功德之果報卽此意也○十觀心者本妙長遠豈可觀心雖不卽是亦不離心何者佛如衆生如一如無二如佛旣觀心得此本妙迹用廣大不可稱說我如如佛如亦當觀心出此大利亦願我如速如佛如故文云聞佛壽無量深心須臾信其福過於彼願我

於未來長壽度衆生如今日世尊諸釋中之王道場師子吼說法無所畏我等於未來一切所尊敬坐於道場時說壽亦如是此卽觀心本妙得六卽利益之相云△問大妙云何答此應三雙六句分別云文云佛自住大乘又云如是大果報又云有大車而題稱爲妙如涅槃云大般涅槃微妙經典而題稱爲大卽妙是大卽大是妙也大品云色非深非妙乃至識非深非妙此是大破妙此文云一切法空寂無漏無爲無大無小此是妙破大如大阿羅漢此大猶脩於妙如滅止妙離此妙猶更脩大云問若大妙一

等餘經俱應稱妙答餘經通論約理大妙不殊而別帶方便此經不帶方便故別稱妙小乘得入發迹顯本故別稱妙問大小俱稱妙大小俱明常一往斥之云云小乘滅止妙離名同理異不得是常竝云不得是妙答妙名不可思議小乘真諦亾言絕慮通得是不思議通名爲妙耳次當縱之亦得以三無爲稱常而常異又竝既俱稱常亦俱會一答會諸見同入真而會異又竝俱無常俱麤俱不會耶例通而義異云何大乘無常大乘非但無無常亦無於常以無於常故言無常云何大乘是麤夫有言說卽名爲麤云何

大乘不會耶一切諸法皆是佛法更何所會云云△

次釋蓮華者爲四意一定法譬一引舊釋三出經論四正解釋定法譬者權實難顯借喻蓮華譬於妙法又七喻文多故以譬標題又解云蓮華非譬當體得名類如劫初萬物無名聖人觀理準則作名如蛛羅引絲倣之結網蓬飛獨運依而造車浮槎汎流而立舟鳥跡成文而寫字皆法理而制事耳今蓮華之稱非是假喻乃是法華法門法華法門清淨因果微妙名此法門爲蓮華卽是法華三昧當體之名非譬喻也餘經多自釋名此經無解或是其文未度耳而此

兩釋皆有道理今融二意問蓮華定是法華三昧之蓮華定是華草之蓮華答定是法蓮華法蓮華難解故草華爲喻利根卽名解理不假譬喻但作法華之解中下未悟須譬乃知以易解之蓮華喻難解之蓮華故有三周說法逗上中下根約上根是法名約中下是譬名三根合論雙標法譬如此解者與誰爲諍耶今且依法譬爲釋也二引舊解寂師序云未敷名屈摩羅將落名迦摩羅處中盛時名分陀利遠師云分陀利伽是蓮華開喻然體逐時遷名隨色變故有三名也大經亦云人中蓮華分陀利華二名並題者

應有通別之異今取蓮華是通分陀利是別稱道朗云鮮白色或翻爲赤色或翻爲最香如此皆是開盛之義舉分陀利則兼之矣問梵本舉別此方用通何也答外國有三時名此方則無但舉通名通自兼別他解蓮華有十六義蓮華從緣生譬佛性從緣起蓮華能生梵王譬從緣生佛蓮華生必在淤泥譬解起生死蓮華是瑞見者歡喜譬見者成佛蓮華從微之著譬一禮一念皆得作佛蓮華必俱譬因果亦俱華必蓮譬因必作佛蓮華辭引入蓮華世界蓮華是佛所踐譬衆聖託生此十譬祇是今家譬行妙中片意

耳蓮華生淤泥淤泥不染譬一在三中三不染一蓮華三時異譬開三祇是一蓮華有開有合譬對緣有隱有顯蓮華於諸華最勝譬諸說中第一華開實顯譬巧說理顯蓮華有三時異譬權實適時此六譬祇是今家說法妙中片意耳如光宅云餘華華果不俱譬餘經偏明因果此蓮華華果必俱譬此經雙辨因果弟子門明因師門明果故借蓮華爲喻今謂此解語略而義偏若迹門師弟各有因果文云我盡行諸佛所有道法道場得成果卽師之因果會三歸一卽弟子因得記作佛卽弟子果本門云我本行菩薩道

時卽師因我得佛已來甚大久遠卽師果我昔教其初發心卽弟子因今皆住不退悉當得成佛卽弟子果彼義偏略故不用且助成其語如四微色法不當華之與蓮而約微論華論蓮今實相之理不當本迹因果而約理明於本迹因果耳又如四微不當開之與合而約微論開合實相不當權實而約實相論開權顯實發迹顯本耳三引經論者法華論列十七名一無量義二最勝三大方等四教菩薩法五佛所護念六諸佛祕藏七一切佛藏八一切佛密字九生一切佛十一切佛道場十一一切佛所轉法輪十二一

切佛堅固舍利十三諸佛大巧方便十四說一乘十五第一義住十六妙法蓮華十七法門攝無量名字句身頻婆羅阿閻婆等餘名悉不解釋唯列十七名次解蓮華有二義一出水義不可盡出離小乘泥濁水故復有義蓮華出泥水喻諸聲聞入如來大衆中坐如諸菩薩坐蓮華上聞說無上智慧清淨境界證如來密藏故二華開者衆生於大乘中心怯弱不能生信故開示如來淨妙法身令生信心故今解論意若言令衆生見淨妙法身者此以妙因開發爲蓮華也若言入如來大衆坐蓮華上者此以妙報國土爲

蓮華也何者盧舍那佛處蓮華藏海共大菩薩皆非生歟人若聲聞得入於此卽妙報國土爲蓮華也彼論望今意乃是行位兩妙耳大集云憐愍爲莖智慧葉三昧爲鬚解脫敷菩薩蜂王食甘露我今敬禮佛蓮華又以戒定慧陀羅尼爲纓珞莊嚴菩薩今解經當是菩薩攬四法成假名人如蜂在華復以前四法自資如蜂食華也四正釋者若依大集行法因果爲蓮華菩薩處上卽是因華禮佛蓮華卽是果華若依法華論以依報國土爲蓮華復由菩薩脩蓮華行報得蓮華國土當知依正因果悉是蓮華之法何須譬

顯爲鈍根人不解法性蓮華故舉世華爲譬亦應何妨然經文兩處說優曇鉢華時一現耳此華若生輪

王應出若說此經卽授佛記法王王世也此靈瑞華似蓮華故以爲喻若從此意卽是借喻喻於妙法夫

喻有少喻偏喻如涅槃二云

但少喻以月喻而不得

求其眉目雪山況象不可覓其尾牙今法華三昧無以爲喻喻此蓮華耳夫華有多種已如前說唯此蓮華華果俱多可譬因含萬行果圓萬德故以爲譬又餘華麤喻九法界十如是因果此華妙喻佛法界十如因果又以此華喻佛法界迹本兩門各有三喻喻

述者一華生必有於蓮爲蓮而華蓮不可見此譬約實明權意在於實無能知者文云我意難可測無能發問者又云隨宜所說意趣難解二華開故蓮現而須華養蓮譬權中有實而不能知今開權顯實意須於權廣識恒沙佛法者祇爲成實使深識佛知見耳三華落蓮成卽喻廢三顯一唯一佛乘直至道場菩薩有行見不了了但如華開諸佛以不行故見則了了譬如華落蓮成此三譬迹門從初方便引入大乘終竟圓滿也又三譬譬本門者一華必有蓮譬迹必有本迹含於本意雖在本佛旨難知彌勒不識二華

開蓮現譬開迹顯本意在於迹能令菩薩識佛方便  
既識迹已還識於本增道損生三華落蓮成譬廢迹  
顯本既識本已不復迷迹但於法身脩道圓滿上地  
也此三譬譬本門始從初開終至本地二門六譬各  
有所據初重約佛界十如施出九界十如次重開九  
界十如顯佛界十如三重廢九界十如成佛界十如  
三譬攝得迹門始終盡若得此意十二因緣四諦三  
諦等智行位乃至功德利益亦用此譬言之云第  
四重約本佛界十如施出迹中佛界十如第五重開  
迹中佛界十如顯出本中佛界十如第六重廢迹中

佛界十如成本中佛界十如始終圓滿開合具足是  
爲少分以蓮華爲譬也多分喻者釋論解師子吼義  
從深山谷種生長身力手足爪牙頭尾震吼等譬  
師子吼法門亦如大經明波利質多樹黃鳴蛇果等  
偏喻行人今亦如是從初種子乃至蓮成喻於妙法  
也譬如石蓮烏皮在外白肉在內四微爲質卷荷欲  
生微細衆具開華布鬚蓮實房成初後不異蓮華始  
終十義具足譬佛界衆生始自無明終至佛果十如  
是法無有缺減總譬竟譬如石蓮黑則叵染硬則叵  
壞不方不圓不生不滅劫初無種故不生今不異初

故不滅是名蓮子相一切衆生自性清淨心亦復如  
是不爲客塵所染生欵重積而心性不住不動不生  
不滅卽是佛界如是相淨名曰一切衆生卽菩提相  
卽其義也譬如蓮子雖復烏皮淤泥之中白肉不改  
一切衆生了因智慧亦復如是五住淤泥生死果報  
一切智願猶在不失是名佛界如是性故言煩惱卽  
菩提又諸法不生般若生卽其義也譬如蓮子在淤  
泥中而四微不朽是名蓮子體一切衆生正因佛性  
亦復如是常樂我淨不動不壞名佛界如是體大經  
言是味真正停留在山草木叢林不能覆滅卽其義

也譬如蓮子爲皮殼所籠爲泥所沒而卷荷在心而  
有生長之氣一切衆生心亦如是雖爲苦果所縛集  
惑所沈而能於中發菩提心甚大雄猛如師子乳如  
師子筋弦是名佛界如是力經言若發菩提心動無  
邊生死破無始有輪闍浮人未見果而能勇猛發心  
也譬如蓮子雖復微小烏皮之內具有根莖華葉鬚  
臺衆具頓足是名蓮子如是作一切衆生初發菩提  
心亦復如是明解決定慈悲誓願上求下化誓取成  
就志不疲退是名佛界如是作華首經言一切諸功  
德皆在初心中卽其義也譬如蓮子根依淤泥而華

處虛空風日照動晝夜增長榮耀頓足一切衆生亦復如是從無明際發菩提心脩菩薩行出離生死入法性中因行成就值於佛日被神通風其心念念入薩婆若海此名佛界如是因經言於無量劫所作功德不如五莖蓮華上然燈佛得功德多此是真因成就卽其義也譬如蓮華鬚彌圍達在華內蓮外此名蓮華如是緣菩薩亦如是於真因中具足萬行六波羅蜜一行一切行資助於因如鬚在華內若得果時衆行休息如鬚在蓮外是名佛界如是緣經言盡行諸佛所有道法卽其義也譬如蓮華華成結蓮而華

葉零落臺子成實此名蓮子如是果菩薩亦如是真因所感無上菩提大果圓滿究竟成實是名佛界如是果故經言佛子行道已來世得作佛卽其義也譬如蓮實房臺包達此名蓮子如是報菩薩亦如是大果圓滿無上報足習果之果依於報果如實依臺經言如是大果報久脩業所得卽其義也譬如泥蓮四微處空蓮四微初後不異此名蓮子本末等一切衆生亦如是本有四德隱名如來藏脩成四德顯名爲法身性德脩德常樂我淨一而無二是名佛界十如本末究竟等經言衆生如佛如一如無二如卽其義

也是用蓮華譬十如境竟次用蓮華譬十二因緣者  
烏皮淤於泥水草重覆通如上說也卽是無明支種子  
能生力卽是行支內有卷荷華鬚備具卽是識名色  
六入觸受支含潤愛取有支團圓盤屈不能得出卽  
是老死支若能芽鋒萌動鑽烏皮破卽是無明滅不  
復在烏皮內生卽是諸行滅出繫殼外卽是老死滅  
此略譬四種十二因緣也次用蓮華譬四諦者烏皮  
譬界內苦白肉譬界內集泥譬界外集水譬界外苦  
道滅可知此通譬四種四諦也次用蓮華譬二諦者  
蓮藕莖葉等譬俗蓮藕莖孔空譬真此通譬七種二

諦也次用蓮華譬三諦者真俗如前四微擬常樂我  
淨譬中道第一義諦此通譬五種三諦也四微無生  
無滅譬一實諦劫初無生今時無滅譬無諦無說也  
用蓮華譬境妙竟次更譬九妙者內有生性譬智妙  
卷荷生性譬空智妙鬚葉生性譬假智妙蓮臺四微  
生性譬中智妙此三生性譬一心三智妙也蓮子雖  
小備有根莖華葉譬行妙莖卽慈悲葉卽智慧鬚卽  
三昧開敷卽解脫又葉以譬三慈者覆水青葉譬衆  
生緣慈覆水黃葉譬法緣慈倚葉譬無緣慈倚荷若  
出蓮生不久無緣慈成得記不久又根華子葉利益

人蜂卽檀香氣卽尸生泥不辱卽忍增長卽精進柔溼卽禪不汚卽慧齊此譬行妙也蓮譬理卽位芽鑽皮麤住位芽出皮細住位鑽泥欲定位齊泥未到位出泥在水四禪位禪定如水能洗欲塵處水增長譬無色位齊此譬觀行蓮華位出水譬破見思相似蓮華十信位處空含而欲敷譬十住位鬚臺可識譬十行位隨日開迴譬十迴向位敷舒成就荷負蜂蝶譬十地位鬚葉零落臺子獨在譬休息衆行妙覺圓滿果上無事真常湛然此皆譬位妙也蓮有四微譬真性軌蓮房內虛莖藕中空譬觀照軌臺房園達譬資

成軌此譬三法乘妙也蓮成處空影臨清水譬顯機顯應影臨濁水譬冥機冥應影臨風浪之水譬亦冥亦顯機應大經云闇中樹影夜影臨水譬非冥非顯機應此等譬感應妙也若風搖蓮華東昂西倒向南映北下風則合上風則開者卽譬東涌西沒中涌邊沒等此譬地動瑞日暮華合譬入定瑞日出華開譬說法瑞遠望則紅近望則白赤華青葉相映輝赫譬放光瑞流芳徧野譬栴檀風瑞藥株飄颻譬天雨華瑞風雨飄灑翻珠相棠譬天鼓自然鳴瑞此等皆譬神通妙也華合未開譬隱一乘分別說三華葉正開

譬會三歸一但說一乘華落蓮存譬絕教冥理若知  
如來常不說法乃名多聞此等譬說法妙也從一藕  
邊更生一華展轉復生無量蓮華譬業生眷屬妙從  
一蓮房墮子在泥更生蓮華展轉復生無量蓮華譬  
神通眷屬妙掘移彼藕採彼蓮子種於此池蓮華熾  
盛譬願生眷屬妙彼池飛來如遊絲薄霧入於此池  
蓮華熾盛譬應生眷屬妙魚鼈喫喟其下蜂蝶翔集  
其上譬衆生果報清涼之妙益見者歡喜譬於因益  
採用其葉譬二草益採用其華譬妙小樹益採用其  
蓮譬妙大樹益採用其藕譬妙實事益此等譬功德

利益如是等譬及餘無量譬喻以譬迹中十妙云

次譬本者譬如一池蓮華始熟已墮落投於泥水  
方復生長乃至成熟如是展轉更生熟歲月既積遂  
徧大池華田布滿佛亦如是本初修因證果已竟爲  
衆生故更起方便在生死中示初發心復示究竟數  
數生滅無數百千本地垂應俯同凡俗更修五行烏  
蓮更生莖葉譬更修聖行蓮子四微稍稍增長譬更  
修天行荷葉始生譬更修梵行蓮子墮泥譬同諸惡  
更脩病行蓮芽始萌譬同小善更脩嬰兒行如是三  
世益物不可稱計徧滿法界無非分身垂迹開迹廢

迹等益云云若非蓮華何由徧喻上來諸法法譬雙辨故稱妙法蓮華也

音同

妙法蓮華經玄義卷第八上

天台

智者

大師說

第二釋通名者經一字也具存胡音應云薩達磨分陀利脩多羅薩達磨此翻妙法分陀利此翻蓮華已如上釋脩多羅或云脩單蘭或云脩妬路彼方楚夏此土翻譯不同或言無翻或言有翻釋此爲五一明無翻二明有翻三和融有無四歷法明經五觀心明經言無翻者彼語多含此語單淺不可以單翻復應留本音而言經者開善云非正翻也但以此代彼耳此間聖說爲經賢說子史彼聖稱經菩薩稱論旣不

可翻宜以此代彼故稱經也既不可翻而含五義一  
法本亦云出生二云微發亦云顯示三云涌泉四云  
繩墨五云結鬢今祇作五義不可翻今於一中作三  
三五十五義一教本二行本三義本今廣釋之言法  
本者一切皆不可說以四悉檀因緣則有言說世界  
悉檀說則爲教本爲人對治則爲行本第一義悉檀  
則爲義本所言教本者金口所說一言爲本派出無  
量言教若通若別當時被物聞卽得道故經言一一  
脩多羅復有無量脩多羅以爲眷屬若後人不解菩  
薩以佛教爲本作通論別論申通別經令佛意不壅

尋者得道良由其論有本故也諸外道等雖有所說  
不與脩多羅合戲論無本不能得道經是行本者示  
人無諍法導達通塞開明眼目救治人病如教脩行  
則起通別諸行從此至彼入清涼池至甘露地泥洹  
真法寶衆生從種種門入故知經是行本經是義本  
者尋一句詮於一義尋無量句詮無量義或尋一句  
詮於無量義尋無量句詮於一義若通若別尋詮會  
入故經是義本束此三種爲法門者教本卽是聞慧  
行本卽是思慧義本是脩慧見真法本之義尚已多  
含故不可翻也或言出生例此可知二含微發者佛

以四悉檀說言辭巧妙次第詮量初中後善圓滿具足如大海水漸漸轉深聞教之者初聞世界悉檀次第領受分別法相微有解生漸漸增長明練通達又偏讀諸異論廣知智者意多聞強識以至成佛就此卽約教論微發初聞爲人對治卽能起行始人天小行次戒定慧入無漏行見道脩道遂證無學從小入大終于妙覺是約行論微發初聞第一義悉檀展轉增廣入於聞思煥頂世第一次入見諦得真第一義次入脩道至無學從小入大見似真中道起自毫末終成合抱也東此三發爲法門者依小乘卽三種解

脫發依大乘初住中有教發是般若行發卽如來藏理發是實相微發已自多含故不可翻也三含涌泉者從譬爲名也佛以四悉檀說法文義無盡法流不絕若聞世界說一句解無量句月四月至歲如風於空中自在無障礙說初心解已如涌泉何況後心何況如來猶如石泉流潤偏益也若聞爲人對治起無量行恒沙佛法種種法門一行無量行人善境界登八正直道若聞第一義理若虛空虛空之法不可格量偏一切處是名義涌泉東此爲法門者教泉是法無礙辯行泉卽辭無礙辯義泉卽義無礙辯樂說通

三處涌泉已自多含故不可翻也四含繩墨者佛以四悉檀說初聞世界裁愛見之邪教不爲邪風倒惑得入正轍卽教繩墨也若聞爲人對治遠離非道入好正濟道品之路卽行繩墨也若聞第一義裁愛見此峯得至彼岸不保生歟亦不住無爲卽義繩墨束此爲法門者教裁邪即是正語行裁邪卽正業正精進正念正定等義裁邪卽正見正思惟等繩墨已自多含故不可翻五含結鬚者結教行理如結華鬚令不零落世界悉檀結佛言教不零落爲人對治結衆行不零落第一義結義理不零落束此爲法門者結

教成口無失結行卽身無失結義卽意無失亦是三種共智慧行亦是三陀羅尼教不零落是聞持陀羅尼行不零落行陀羅尼義不零落卽總持陀羅尼若作嚴身釋者卽是約教名智慧莊嚴約行名福德莊嚴約義卽是所莊嚴所莊嚴卽是法身爲定慧莊嚴也一切衆生皆有法身法身體素天龍之所忽劣若脩學定慧莊嚴法身則一切見敬也舊云經含五義今則經含十五義豈可單漢翻胡名含之釋如此云訓者訓常今釋其訓天魔外道不能改壞名爲教常真正無雜無能踰過名爲行常湛然不動決無異

趣名爲理常又訓法者法可軌行可軌理可軌今直釋訓已舍六義況胡言重複而可單翻耶二言有翻者亦爲五一翻爲經經由爲義由聖人心口故今亦隨而釋之謂教由行由理由一切脩多羅一切通別論一切疏記等皆由聖人心口是名教由一切契理行一切相似行一切信行法行皆由聖人心口故以行爲由一切世間義一切出世義一切方便義一切究竟義皆由聖人心口故以義爲由教由世界行由爲人對治義由第一義悉檀又言經者緯義如世絹經以緯織之龍鳳文章成佛以世界悉檀說經菩薩

以世界緯織經緯合故賢聖文章成又約行論經緯慧行爲經行行爲緯經緯合故八正文章成又約理論經緯者詮真爲經詮俗爲緯經緯合故二諦文章成二翻爲契者契緣契事契義世界說是契緣隨且說是契生善隨對治說是契破惡是爲契事隨第一義說是契義三翻法本者卽教行理本如前釋云四翻線者線貫持教行理令不零落嚴身等義如前釋又線能縫義縫教使章句次第堪可說法如支佛不值十二部線不能說法世智辯聰亦不得經線正語不成又線能縫行依經則行正違經則行邪又縫

理者理所不印墮六十二邪理所印者會一究竟道也五翻善語教亦是善行教亦是善理教世界悉檀說卽善語教爲人對治卽善行教第一義說卽善理教是名脩多羅有五種翻也三和融有無者昔佛法初度胡漢未明言無翻者乃是河西羣學所傳晚人承用加以此代彼今傳譯煥爛方言稍通豈苟執無翻猶以多含爲解若多含者何局五耶若有翻者以何爲正義寧種種翻那得多若翻脩多羅爲經者脩多羅有九謂通別脩多羅藏等何不見周正十二部中經部三藏中有經藏耶若翻爲契法本等者亦應

改正十二部中有契部法本部線部善語教部三藏中應有線等藏彼諸處皆不從此翻何獨通脩多羅耶釋論云般若尊重智慧輕薄何得用輕翻重若爾卽是無翻家證夫實相尊重不可說遂得作胡言而說何不得作漢語而翻若不可翻亦不可說此卽有翻家證舊云涅槃舍三德不可用滅度爲翻又梁武云滅度小乘法不可用翻大涅槃此未必爾經言有涅槃大涅槃亦應有滅度大滅度此經云如來滅度豈非大滅度旣以小滅度翻小涅槃何得不以大滅度翻大涅槃若謂滅度偏不含三德者今作含釋滅

者卽解脫解脫必有其人人卽法身法身不直身必  
有靈智靈智卽般若又大卽法身滅卽解脫度卽般  
若但標滅度舍三宛然何得無翻耶若執一言則彼  
彼相是非不達佛意已如上說今和融有無虛豁義  
趣若言無翻名舍五義於一一義更舍三義彌見其  
美若作有翻於一一翻亦具三義轉益旨深任彼有  
無何所乖謹大經云我終不與世間共諱世智說有  
我亦說有世智說無我亦說無如此通融於二家無  
失而有理存焉復次圓義無方處處通入乃如上說  
若正翻名世諦不得混濫今且據一名以爲正翻亦

不使二家有怨何者從古及今譯胡爲漢皆題爲經  
若餘讖是正何不改作契線若傳譯僉然則經正明  
矣若等是無翻何不標微發漏泉等今正用經於多  
含義強含三法本三微發三涌泉諸繩墨結鬢等義  
亦含契線善語教訓法訓常等無不攝在經一字中  
餘句亦如是諸大小乘教皆以經爲通名故不用餘  
句也四歷法明經者若以經爲正翻何法是經舊用  
三種一用聲爲經如佛在世金口演說但有聲音詮  
辯聽者得道故以聲爲經大品云從善知識所聞也  
二用色爲經若佛在世可以聲爲經今佛去世紙墨

傳持應用色爲經大品云從經卷中聞三用法爲經  
內自思惟心與法合不由他教亦非紙墨但心曉悟  
卽法爲經故云脩我法者證乃自知云云二塵爲經  
施於此土耳識利者能於聲塵分別取悟則聲是其  
經於餘非經若意識利者自能研心思惟取決法是  
其經於餘非經眼識利者文字詮量而得道理色是  
其經於餘非經此方用三塵而已餘三識鈍鼻臭紙  
墨則無所知身觸經卷亦不能解舌歎文字寧別是  
非若他土亦用六塵亦偏用一塵如淨名曰以一食  
施於一切於食等者於法亦等於法等者於食亦等

此卽偏用舌根所對爲經或有國土以天衣觸身卽  
得道此偏用觸爲經或見佛光明得道此偏用色爲  
經或寂滅無言觀心得道此偏用意爲經如衆香土  
以香爲佛事此偏用香爲經他方六根識利六塵得  
爲經此土三根識鈍鼻不及驢狗鹿等云何於香味  
觸等能得通達問根利故於塵是經鈍者塵則非經  
耶答六塵是法界體自是經非根利取方乃是經何  
者大品云一切法趣色是趣不過此色能詮一切法  
如黑墨色一畫詮一二畫詮二三畫詮三豎一畫則  
詮王足右畫則詮丑足左畫則詮田出上詮由出下

詮申如是迴轉詮不可盡或一字詮無量法無量字  
共詮一法無量字詮無量法一字詮一法於一黑墨  
小小迴轉詮量大異左迴詮惡右迴詮善上點詮無  
漏下點詮有漏殺活與奪毀譽苦樂皆在墨中更無  
一法出此墨外略而言之黑墨詮無量教無量行無  
量理黑墨亦是教本行本理本黑墨從初一點至無  
量點從點至字從字至句從句至偈從偈至卷從卷  
至部又從點一字句中初立小行後著大行又從點  
字中初見淺理後到深理是名黑色教行義三種微  
發又從黑色漏出點出字句偈不可窮盡漏出諸行

無盡漏出義無盡是名黑色具三漏泉又約黑色裁  
教行義邪又約黑色結教行義髮又以嚴身又色是由  
由色故縛有六道生从由色故脫有四種聖人又  
色訓法法色故能成教行理又色是常色教不可破  
色行不可改色理不可動又色不可翻色義多含故  
又色可翻名色爲經故見色經時知色愛見知色因  
緣生法知色卽空卽假卽中色卽法界總含諸法法  
界文字文字卽空無點無字無句無偈句偈文字畢  
竟不可得是名知字非字非字亦字墨色是經爲法  
本者若於墨字生瞋斷他壽命若於墨字起愛而作

盜姪乃至於墨起癡而生邪見當知墨字是四趣本若於墨字生慈生捨乃至生正見者當知墨字是人天本若知墨字是果報無記無記是苦諦於報色生染卽是集諦知字因緣所成苦空無我是道諦旣知字非字不生字倒諸煩惱滅卽滅諦知字四諦知字四諦能生煥頂若向若果賢聖解脫當知墨字是聲聞本若於字不了名無明於字起愛恚是諸行分別字好醜是識識於字名名色字涉於眼名六入字塵對根名爲觸納領染著卽是受纏綿不捨是愛竭力推求是取取則成業名爲有有能牽果是名生老病

从苦輪不息是則十二因緣本若能知字非字無明卽滅不至於行乃至不至老死無明滅則老死滅當知此字是辟支佛本若知字卽空非滅已空字性本空空中無愛恚乃至無邪正字不可得知字者誰云何衆生妄生取捨起慈悲誓願行六度濟衆生入如實際亦無衆生得滅度者當知此字是菩薩本若知字非字非字非非字無二邊倒名淨淨則無業名我我則無苦名樂無苦則無生死名常何以故字是俗諦非字是真諦非字非非字是一實諦一諦卽三諦三諦卽一諦是名境本若知墨字從紙筆心手和合

而成一一字推不得一字一一點推亦不得字則無所不得心手卽不得能無能無所知能所誰是一切智本字雖非字非字而字從心故有點從點有字從字有句從句有偈從偈有行從行有卷從卷有帙從帙有部從部有藏從藏有種種分別是道種智本雖非字非非字而雙照字非字是爲一切種智本雪山爲八字捨所愛身是爲行本我解一句乃至半句得見佛性入大涅槃卽是位本我得三菩提皆由聞經及稱善哉字卽乘本若忘失句逗還令通利與其三昧及陀羅尼卽感應本依文學通卽神通本依字故

得語卽說法本說字教他卽眷屬本勤學此字祿在其中卽利益本如此解字手不執卷常讀是經口無言聲徧誦衆典佛不說法恒聞梵音心不思惟普照法界如此學問豈不大哉當知黑字是諸法本青黃赤白亦復如是非字非非字雙照字非字不可說非不可說不可見非不可見何所簡擇何所不簡擇何所攝何所不攝何所棄何所不棄是則俱是非則悉非能於黑色通達一切非於一切非通達一切是通達一切非非非是一切法邪一切法正若於黑色不如是解則不知字與非字黃白赤青有對無對皆不

能知若於黑色通達知餘色亦如是此卽法華經意  
以色爲經也聲塵亦如是或一聲詮一法云耳根  
利者卽解聲愛見因緣卽空卽假卽中知脣舌牙齒  
皆不可得聲卽非聲亦聲非聲非非聲聲爲教  
行義本種種等義皆如上說卽是通達聲經香味觸  
等亦復如是文云一切世間治生產業皆與實相不  
相違背卽此意也外入皆經周徧法界者內入亦如  
是內外入亦如是經云非內觀得解脫亦不離內觀  
云是則一塵達一切塵不見一塵一切塵通達一  
塵一切塵於一識分別一切識亦不見一識一切識

而通達一識一切識自在無礙平等大慧何者是經  
何者非經若欲細作於一一塵識例可解有翻無翻  
以三義織之後用三觀結之云歷諸教分別經者  
若言理絕文字是世俗寄字詮理理可是經文  
字非經六塵等皆是經詮非正經也此卽三藏中經  
耳若無離文字說解脫義文字性離卽是解脫六塵  
卽實相無二無別如上所說者圓教中經也帶三方  
便作此說者方等中經也帶二方便如此說者般若  
中經也帶一方便作如此說者華嚴中經也五明觀  
心經者皆類上爲四也一類無翻者心含善惡諸心

數等當知此心諸法之都何可定判若惡是心心不含善及諸心數若善是心心不舍惡及諸心數不知何以目心以略代總故知略心能含萬法況不含五義耶華嚴云一微塵中有三千大千世界經卷卽其義也心是法本者釋論云一切世間中無不從心造無心無思覺無思覺無言語當知心卽語本心是行本者大集云心行大行徧行心是思數思數屬行陰諸行由思心而立故心爲行本心是理本者若無心理與誰舍以初心研理恍恍將悟稍入相似則證真實是爲理本心舍微發者初刹那心微微而有次心

若存若亡次漸增長後則決定暢心而發口是語微發初心習行行猶微弱次少樹立後成大行卽行微發初觀心不見心理更脩髮鬚乃至相似真實卽理微發心舍涌泉者心具諸法障故不流如土石壓泉去壅涌溜若不觀心心闇不明所說不長若觀心明徹則宣辯無方流溢難盡豈非語涌泉若不觀心行則有間以觀心故念念相續翻六蔽成六度六度攝一切行是行涌泉若能觀心如利鎬斲地磐石沙鹵理水清澄滔滔無竭卽義涌泉心舍結髮者觀念不謬得一聞持穿文無失觀心得定共力穿行無失觀

心得道共力穿義無失又觀心得  
皆可解又心是繩墨若觀心得正語離邪倒說觀心  
正則勉邪行心無見著則入正理事行如繩理行如  
墨彈愛見木成正法器也是爲心經多舍略示十五  
義云二類有翻明觀者心卽是由三義由心一切  
語言由覺觀心一切諸行由於思心一切義理由於  
慧心經云諸佛解脫當於衆生心行中求心是經緯  
以覺爲經以觀爲緯織成言語又慧行心爲經行行  
心爲緯織成衆行心豎緣理爲經心橫緣理爲緯織  
成義理云又觀境爲經觀智爲緯觀察迴轉織成

一切文章又心卽是契觀慧契境是契緣契樂欲心  
爲契教契便宜對治心爲契行契第一義心契理心  
爲法本心爲線者如前云心爲善語教者法之與  
語俱通善惡今以善法善語定之心之與觀亦通善  
惡今以善心善觀定之卽是善語教善行善理故心  
具三義心是可軌者若無觀則無規矩以觀正心王  
心王正故心數亦正行理亦爾心王契理數亦契理  
故名可軌也心常者心性常定猶如虛空誰能破者  
又惡覺不能壞善覺邪行不干正行邪理不壞正理  
故心名常隨諸事釋一一向心爲觀觀慧彌成於事

無乖如火益薪事理無失卽文字無文字不捨文字而別作觀也三類和融有無明觀者可解云四類歷法爲觀者若小乘明惡中無善善中無惡事理亦然此則惡心非經則無多含之義隘路不受二人並行若大乘觀心者觀惡心非惡心亦卽惡而善亦卽非惡非善觀善心非善心亦卽善而惡亦非善非惡觀一心卽三心以此三心歷一切心歷一切法何心何法而不一三一切法趣此心一切心趣此法如此觀心爲一切語本行本理本有翻五義無翻五義一於心解釋無滯偏一切心無不是經大意可領不

俟多記也△第二顯體者前釋名總說文義浩漫今頓點要理正顯經體直辨真性真性非無二軌欲令易解是故直說後顯宗用非無初軌偏舉當名耳體者一部之指歸衆義之都會也非但會之至難亦乃說之不易文云是法不可示言辭相寂滅大經云不生不生不可說又云有因緣故亦可得說今略開七條一正顯經體二廣簡僞三一法異名四入體之門五偏爲衆經體六偏爲諸行體七偏一切法體正顯體更明四意一出舊解二論體意三正明體四引文證北地師用一乘爲體此語奢漫未爲簡要一乘語

通濫於權實若權一乘都非經意若實一乘義該三  
軌顯體不明故不用又有解言真諦爲體此亦通濫  
小大皆明真諦小乘真諦故不俟言大乘真諦亦復  
多種今以何等真諦爲體故不用又有解言一乘因  
果爲體今亦不用何者一乘語通已如前說又因果  
二法猶未免事云何是體事無理印則同魔經云何  
可用有人解乘體通因果果以萬德爲體因以萬善  
爲體引十二門論云諸佛大人所乘文殊觀音等所  
乘又引此經佛自住大乘卽果也諸子乘是寶乘是  
因乘也又引普賢觀大乘因果皆是實相私問因果

之乘爲變爲不變若變誰是能通誰是所通若不變  
因果則並皆無此理若別有法通因果當知因果非  
果者經體也十二門論云大人佛不行故名乘豈應  
以不行證因果乘也法華佛自住大乘者此乃乘理  
以御人非住果德也普賢觀明因果皆指實相云何  
將實相證於因果耶今皆不用有人明因乘以般若  
爲本五度爲末果乘以薩婆若爲本餘爲末又因乘  
狹果乘廣又般若相應心是一體乘不相應心是異  
體乘又無所得相應行是近乘低頭舉手有所得是  
遠乘又六度有世出世雜是遠乘三十七品但出世

名近乘又四句度與品悉無得又度與品俱有得又度雜品不雜又品雜度不雜云私謂般若爲乘本者於今經是白牛非經體也薩婆若爲乘本者於今經是道場所成果亦非乘體因乘狹者是縱義果乘廣者是橫義悉非今經乘體般若相應心無所得近遠等於今經悉是莊校賓從都非乘體那忽於皮毛枝葉而興譯論耶喧怒如此誰能別之有人引釋論以六度爲乘體方便運出生死慈悲運取衆生於今經般若是牛五度是莊校方便是賓從慈悲是軒亦非乘體中邊分別論云乘有五一乘本謂真如佛性

二乘行謂福慧三乘攝謂慈悲四乘障謂煩惱是煩惱障行解等是智障五乘果謂佛果也唯識論云乘是出載義由真如佛性出福慧等行由此行出佛果由佛果載出衆生攝大乘論乘有三一乘因謂真如佛性二乘緣謂萬行三乘果謂佛果也法華論明乘體謂如來平等法身又云如來大般涅槃此兩文似如隱顯耳發心伍頭舉手等名乘緣十二門論明乘本謂諸法實相乘主謂般若乘助謂一切行資成乘至至薩婆若此五論明乘體同而莊校小異於今經明乘體正是實相不取莊校也若取莊校者則非佛

所乘乘也二論體意者何意須用此體釋論云諸小乘經若有無常無我涅槃三印印之卽是佛說脩之得道無三法印即是魔說大乘經但有一法印謂諸法實相名了義經能得大道若無實相印是魔所說故身子云世尊說實道波旬無此事何故小三大一小乘明生死與涅槃異生死以無常爲初印無我爲後印二印印說生死涅槃但用一寂滅印是故須三  
大乘生死即涅槃涅槃即生死不二不異淨名曰一切衆生常寂滅相卽大涅槃又云本自不生今則無滅本不生者則非無常無我相今則無滅者則非小

寂滅相唯是一實相實相故言常寂滅相卽大涅槃但用一印也此大小印印半滿經外道不能雜天魔不能破如世文符得印可信當知諸經畢定須得實相之印乃得名爲了義大乘也三正顯體者卽一實相印也三軌之中取真性軌十法界中取佛法界佛界十如是中取如是體四種十二因緣中取不思議不生不滅十二支中取苦道卽是法身四種四諦中取無作四諦於無作中唯取滅諦七種二諦中取五種二諦五二諦中唯取真諦五三諦中取五中道第一義諦諸一諦中取中道一實諦諸無諦中取中道

無諦也若得此意就智妙中簡乃至十妙一一簡出正體例可知也若譬喻明義如梁柱綱紀一屋非梁非柱即屋內之空柱梁譬以因果非梁非柱譬以實相實相爲體非梁柱也屋若無空無所容受因果無實相無所成立釋論云若以無此空一切無所作又譬如日月綱天公臣輔主日月可二太虛空天不可二也臣將可多主不可多也爲此義故須簡出正體如三軌成乘不縱不橫不卽不離顯示義便須簡觀照等唯指真性當名正意分明三軌既然餘法例爾

云四引證者序品云今佛放光明助顯實相義又

云諸法實相義已爲汝等說方便品云唯佛與佛乃能究盡諸法實相偈中云諸佛法久後要當說真實又云我以相嚴身爲說實相印身子領解云世尊說實道波旬無此事又云安住實智中我定當作佛法師品云開方便門示真實相安樂行云觀諸法如實相壽量云如來如實知見普賢觀云昔於靈山廣說一實之道又云觀於一實境界故知諸佛爲大事因緣出現於世祇令衆生開佛知見見此一實非因非果之理耳經文在茲可爲明證也○二廣簡僞者夫正體玄絕一往難知又邪小之名亂於正大譬如魚

江主二三事元人  
目混雜明珠故須簡僞卽爲六意一就凡簡二就外  
簡三就小簡四就偏簡五就譬簡六就悟簡一就凡  
簡者釋論云世典亦稱實者乃是護國治家稱實也  
外道亦稱實者邪智僻解謂爲實也小乘稱實者厭  
苦蘇息以偏真爲實也如是等但有實名而無其義  
何者世間妖幻道術亦稱爲實多是鬼神魅法此法  
入心迷醉狂亂自銜善好謂勝真實立異動衆示奇  
特相或觸體盛屎約多人前張口大咽或生魚臭肉  
增狀餌食或裸形弊服誇倣規矩或直來直去不問  
不答種種謫詭茲誘無智令信染惑著着已求脫臣

得內則病害其身外則誅家滅族禍延親里現受衆  
苦後受地獄長夜之苦生生障道無解脫期此乃世  
間現見何實可論鈍使愛論攝若周孔經籍治法禮  
法兵法醫法天文地理八卦五行世間墳典孝以治  
家忠以治國各親其親各子其子敬上愛下仁義揖  
讓安于百姓霸立社稷若失此法疆者陵弱天下焦  
遑民無聊生鳥不暇栖獸不暇伏若依此法天下太平  
牛馬內向當知此法乃是愛民治國而稱爲實金  
光明云釋提桓因種種勝論卽其義也蓋十善意耳  
脩十善上符天心諸天歡喜求天然報此法爲勝故

言勝論耳又大梵天王說出欲論即是脩定出欲淤泥亦是愛論攝耳世又方術服藥長生練形易色飛仙隱形者稱此藥方秘要真實此亦愛論鈍使攝耳二就外簡者即是外道典籍也若服藥求知聰利明達推尋道理稱此藥方爲勝爲實者藥力薄知不能鑒遠觸藥則失藥歇則失亦非實也若此間莊老無爲無欲天真虛靜息諸誇企棄聖絕智等直是虛無其抱尚不出單四見外何關聖法縱令出單四見外尚墮復四見中見網中行非解脫道若外國論力受梨昌慕撰五百明難其一云瞿曇爲一究竟道爲衆

多究竟道佛言但一究竟道論力云云何諸師各各說究竟道佛指鹿頭汝識其不論力言識究竟道中其爲第一佛言若其得究竟道云何自捨其道爲我弟子耶論力卽悟歎佛法中獨一究竟道又如長爪云一切論可破一切語可轉觀諸法實相干久不得一法入心釋論云長爪執亦有亦無見又云亦計不可說見如斯流類百千萬種虛妄戲論爲惑流轉見網浩然邪智瀾漫觸境生著或時攝揅有無爲有無有無無爲無有非有非無爲有無非有非無爲無百千番牒悉皆見倒生从諸邊非真實也大經云被無

明枷繫生死柱遠二十五有不能得脫卽此義也三  
就小簡者聲聞法中亦云離有離無名聖中道大集  
云拘隣如沙門最初獲得真實之知見然小乘不運  
大悲不濟衆生功德力薄不求作佛不深窮實相則  
智慧劣弱雖云離有離無名聖中道乃以斷常二見  
爲二邊真諦爲中道真無漏慧名爲見證涅槃法名  
爲知雖斷見思除滅分段而住草庵非究竟理對前  
生死有邊卽是涅槃無邊二俱可破可壞非真實道  
故不名實相也四就偏簡者諸大乘經共二乘人帶  
方便說者名字旣同義須分別如摩訥衍中云三乘

之人同以無言說道斷煩惱中論云諸法實相三人  
共得者二乘之人雖共稟無言說道自求出苦無大  
悲心得空則止鈍根菩薩亦爾利根菩薩大悲爲物  
深求實相共實相者智如螢火是故非實不共實相  
智如日光是故爲實大經云第一義空名爲智慧二  
乘但空空無智慧菩薩得不但空卽中道慧此慧寂  
而常照二乘但得其寂不得寂照故非實相菩薩得  
寂又得寂照卽是實相見不空者復有多種一見不  
空次第斷結從淺至深此乃相似之實非正實也二  
見不空具一切法初阿字門則解一切義卽中卽假

卽空不一不異無三無一二乘但一卽別教但二卽圓具三卽三卽真實相也釋論云何等是實相謂菩薩入於一相知無量相知無量相又入一相二乘但入一相不能知無量相別教雖入一相又入無量相不能更入一相利根菩薩卽空故入一相卽假故知無量相卽中故更入一相如此菩薩深求智度大海一心卽三是真實相體也華嚴不共二乘但約菩薩三智次第得亦非正實不次第得者是正實也若方等中四人得三智三人爲虛一人爲實大品三慧說三智屬三人前二不深求淺而非實後一人深求一

心三智是故是實此經汝實我子無復四三之人十方諦求更無餘乘但一實相智決了聲聞法但說無上道純是一實體也

妙法蓮華經卷第八下

一實諦也

前文略說名乘即一實時習次一實時

妙法蓮華經卷第八上

妙法蓮華經玄義卷第八下

天台智者大師說

大經云一實諦者則無有二無有二故名一實諦又一實諦名無虛偽又一實諦無有顛倒又一實諦非魔所說又一實諦名常樂我淨常樂我淨無空假中之異異則爲二二故非一實諦一實諦即空即假即中無異無二故名一實諦若有三異則爲虛偽虛偽之法不名一實諦無三異故卽一實諦若異卽是顛倒未破非一實諦無三異故無顛倒無顛倒故名一實諦異者不名一乘三法不異具足圓滿名爲一乘

是乘高廣衆寶莊校故名一實諦魔雖不證別異空假而能說別異空假若空假中不異者魔不能說魔不能說名一實諦若空假中異者魔不能說魔不顛倒不顛倒故無煩惱無煩惱故名爲淨無煩惱則無業無業故名爲我無業故無報無報故名樂無報則無生死無生死則名常常樂我淨名一實諦一實諦者卽是實相實相者卽經之正體也如是實相卽空假中卽空故破一切凡夫愛論破一切外道見論卽假故破三藏四門小實破三人共見小實卽中故破次第偏實無復諸顛倒小偏等因果四諦之法

亦無小偏等二寶之名唯有實相因果四諦三寶宛然具足亦具諸方便因果四諦三寶何以故實相是法界海故唯此三諦卽是真實相也又開次第之實卽是圓實證道是同故又開三人共得實深求卽到底故又開三藏之實決了聲聞法又開諸見論實於見不動而脩道品故又開諸愛論實魔界卽佛界故行於非道通達佛道一切諸法中悉有安樂性卽絕待明實是經體也五譬簡者今借三喻正顯僞真兼明開合破會等意一譬三獸渡河同入於水三獸有強弱河水有底岸兔馬力弱雖濟彼岸浮淺不深又

不到底大象力強俱得底岸三獸喻三人木喻卽空  
底喻不空二乘智少不能深求喻如兔馬菩薩智深  
喻如大象水輒喻空同見於空不見不空底喻實相  
菩薩獨到智者見空及與不空到又二種小象但到  
底泥大象深到實土別智雖見不空歷別非實圓見  
不空窮顯真實如是喻者非但簡破免馬二乘非實  
亦簡小象不空非實乃取大象不空爲此經體也此  
約空中共爲真諦作如此簡也二譬頗梨如意兩珠  
相似形類欲同而頗梨但空不能雨寶如意珠亦空  
亦雨寶頗梨無寶以喻偏空如意能雨以喻中道此

就有無合爲俗簡僞顯真今經體同如意也又但約  
一如意珠爲譬者得珠不知力用唯珠而已智者得  
之多有所獲二乘得空證空休息菩薩得空方便利益  
普度一切此就舍中真諦簡其得失也今經如智  
者得如意珠以爲經體三譬如黃石中金愚夫無識  
視之謂石擲在糞穢都不顧錄估客得之融出其金  
保重而已金匠得之造作種種釵釧環璫仙客得之  
練爲金丹飛天入地捫摸日月變通自在野人喻一  
切凡夫雖具實相不知脩習估客喻二乘但斷煩惱  
礦保卽空金更無所爲金匠喻別教菩薩善巧方便

知空非空出假化物莊嚴佛土成就衆生仙客喻圓教苦薩即事而真初發心時便成正覺得一身無量身普應一切今經但取金丹實相以爲經體也就同而爲喻從初至後同是於金凡夫圓教俱是實相也就異爲喻者初石異金次金異器器異丹丹色淨徹類若清油柔軟妙好豈同環釧狀乖色別故不一種此就與奪破會簡其得失引此三喻者前喻根性根性有淺深淺得其空深得其假又得其中次喻三情初情但出苦不志求佛道見真卽息次情歷別不能圓脩後者廣大徧法界求第三喻三方便二乘方便

少守金而住別教方便弱止能嚴飾營生圓教方便深故能吞雲納漢今明此經實相之體如大象得底堅不可壞以譬體妙圓珠普雨譬其用巧妙智成仙譬其宗妙如此三譬卽是三德不縱不橫名爲大乘於大乘中別指真性以爲經體六就悟簡者夫法相真正誠如上說行未會理豈得名諦徒勞四說逐語生迷聞株謂軟聞雪謂冷聞貝謂硬聞鵠謂動終不能見乳之真色情闇夜遊何能到諦叫喚求食無有飽理執已爲實餘是妄語此有彼無是非互起更益流動云何名諦若欲見諦慙愧有羞苦到懺悔機感

諸佛禪慧開發觀心明淨信解虛融爾時猶名闇中見杌髮鬚不明人木蟲塵尚不了了若能安忍法愛不生無明豁破如明鏡不動淨水無波魚石色像任運自明清淨心常一如是尊妙人則能見般若金鐸抉眼一指二指三指分明爾時見色言有亦是言無亦是云何有是的的之色與眼相應諦諦之理與智相稱名之爲有云何爲無無復堅冷輒動之相名之爲無論云一切實一切非實亦實亦不實非實非不實如是皆名諸法之實相如舍利弗安住實智中我定當作佛爲天人所敬爾時乃可謂永盡滅無餘是

名真實見體故涅槃云八千聲聞於法華中見如來性如秋收冬藏更無所作約理明無所作此是究竟之理也約教無所作聞此教已更不他聞也約行無所作者脩此行已更不改轍如是等種種無所作義云云略而言之隨智妙悟得見經體也當以隨智妙悟意歷諸諦境中節節有隨情智情智種種分別簡餘情想唯取隨智明見經體也○三一法異名者更爲四一出異名二解釋三譬顯四約四隨一出異名者實相之體祇是一法佛說種種名亦名妙有真善妙色實際畢竟空如如涅槃虛空佛性如來藏中實

理心非有非無中道第一義諦微妙寂滅等無量異名悉是實相之別號實相亦是諸名之異號耳惑者迷滯執名異解經云無智疑惑悔則爲永失小乘論師專於名相而起諍競非法毀人世代倣數爲法怨讐大乘學者亦復如是學妙有者自稱至極聞畢竟空而生誹謗不受其法不耐其人學畢竟空者自類朋聚引正向已推邪與他皆不識天主千名闡釋提桓因而喜聞舍脂夫而恚恭敬帝釋慢辱拘翼將恐其福不補其失實相亦爾同是一法豈可謗一信一耶二解釋者小乘名體由來易簡置而不論今所分別

但約別圓八門更爲四句一名義體同二名義體異三名義同而體異四名義異而體同初句者妙有爲名真善妙色爲義實際爲體次以畢竟空爲名如如爲義涅槃爲體次以虛空佛性爲名如來藏爲義中實理心爲體次以非有非無中道爲名第一義諦爲義微妙寂滅爲體如是等名字所以理趣雖殊而同用一門意無有別故言名義體同也第二句名義體異者如妙有是名畢竟空是義如來藏爲體又空是名如來藏爲義中道是體又如來藏爲名中道爲義妙有爲體又中道是名妙有爲義空爲體如是等四

門更互不同三種皆別故言名義體異也第三句名義同而體異者如妙有爲名妙色爲義畢竟空爲體是則二同一別故言名義同而體異又空爲名如如爲義妙有爲體此亦二同一別餘兩門亦如是故言名義同而體異也第四句名義異而體同者如妙有等名名不同真善色等義義有異而同歸一體更無二趣故言名義異而體同三門亦如是前三句名義皆不融初句尋一名得一義得一體當門圓融不關餘事第二句尋異名識異義異體體義名最不融此易可知第三句體既不融名義雖同終成不合皆是

別門明義不得意者諱從此起或小陵大或大奪小何者小乘欲斷生死聞畢竟不但空順其情欲謂是但空執此起諱又小乘欲斷生死故非有破執涅槃病故非無聞中道非有非無扶其小情謂是已典非有非無故於二門多起諱競若聞中實理心與小乖則不起諱何者二乘訛空而今聞有二乘灰身滅智今聞心智與彼情乖故不執作諱也是以小陵盜大故諱大奪小者大乘學者見共三乘人空門非空非有門名同二乘不見深意卽推屬誑相不真宗但取妙有亦空亦有兩門引是圓常之法輸二不輸二

此諍少可若知空是不但非有非無是遮二邊者則四門俱奪而小苦諍於二門又大乘四門名義不融門門各諍自相吞噬況爾小乘野干陵奪師子寧當不敢爾乎三句生諍非今經體也第四句名義異而體同體有衆義功用甚多四門隨緣種種異稱以體融故圓應衆名法體既同異名異義而不諍也其相云何今當略說無量義云無量義者從一法生其一法者所謂實相實相之相無相不相不相無相名爲實相此從不可破壞真實得名又此實相諸佛得法故稱妙有妙有雖不可見諸佛能見故稱真善妙色

實相非二邊之有故名畢竟空空理湛然非一非異故名如如實相寂滅故名涅槃覺了不改故名虛空佛性多所含受故名如來藏寂照靈知故名中實理心不依於有亦不附無故名中道最上無過故名第一義諦如是等種種異名俱名實相種種所以俱是實相功能其體既圓名義無隔蓋是經之正體也復次諸法既是實相之異名而實相當體又實相亦是諸法之異名而諸法當體妙有不可破壞故名實相諸佛能見故名真善妙色不雜餘物名畢竟空無二無別故名如如覺了不變故名佛性含備諸法故名

如來藏寂滅靈知故名中實理心遮離諸邊故名中道無上無過名第一義諦隨以一法當體隨用立稱例此可知大經云解脫之法多諸名字百句解脫祇一解脫大論云若如法觀佛般若與涅槃是三則一相其實無有異若得此意知種種名皆名實相亦名般若亦名解脫三法亦是諸法名諸法亦是三法體云二譬顯者譬如一人名金師能鍛金其體黃譬  
云三譬顯者譬如一人名青而能作漆其身白淨又一

人名烏能研朱其身則紫如是等無量百千名技身異譬第二句譬如百人同姓同名同解一技而其身

各異譬第三句譬如一人遭亂家禍處處換姓處處變名如張儀范蠡之類涉多官職身備衆位若從多技得名書畫金鐵等師若從文官儒林中散若從武官熊渠次飛隨處換名譬名異隨技得稱譬義異而體是一更非異人經言王家力士一人當千此人未必力敵於千直以種種技藝能勝千故故稱當千工偏衆技無技不通仕具衆位無官不歷是不可壞人妙技術人有體氣人無過患人偏通達人能破敵人上族姓人富財技人多知人中庶信直人頂蓋人譬第四句法也譬顯冷然故知前三句屬別意後一句

屬圓意也四約四隨者問實相一法何故名義紛然  
答隨彼根機種種差別赴欲赴宜赴治赴悟例如世  
人學數則捨大脩衍則棄小習空則惡有善地則彈  
中既不欲聞聞之不悅無心信受不滅煩惱不發道  
心各於已典偏習成性得作未來聞法根緣如來于  
時以佛眼觀其信等諸根以若干言辭隨應方便而  
爲說法爲有根性說妙有真善妙色不違不逆信戒  
忍進蕩除空見即能悟入契於實相爲空根性說畢  
竟空如如涅槃等諦聽諦受以善攻惡無相最上爲  
亦空亦有根性說虛空佛性如來藏中實理心欣然

起善離非心淨爲非空非有根性者卽說非有非無  
中道遮於二邊不來不去不斷不常不一不異等欲  
得聽聞欣如渴飲信樂脩習衆善發生執見皆祛無  
惡不盡第一義理豁然明發隨此四根故四門異說  
說異故名異功別故義異悟理不殊體終是一故求  
那跋摩云諸論各異端脩行理無二偏執有是非達  
者無違諍故四隨殊唱是一實之異名耳○第四明  
入實相門者夫實相幽微其理淵奧如登絕壑必假  
飛梯欲契真源要因教行故以教行爲門下文云以  
佛教門出三界苦佛子行道已來世得作佛門名能

通此之謂也略爲四意一略示門相二示入門觀三示麤妙四示開顯示門相者夫佛法不可宣示赴緣說者必以四句詮理能通行人入真實地大論云於如是法說第一義悉檀所謂一切實一切不實一切亦實亦不實一切非實非不實如是皆名諸法之實相實相尚非是一那得言四當知四是入實相門耳又云四門入清涼池是門無礙非唯利者得入鈍者亦入非唯定者散心專志精進者亦得入又云般若有四種相所謂有相無相乃至非有非無相般若尚非一相云何四相當知亦是入般若門也又云般若

波羅密譬言如大火燄四邊不可取邪見火燒故若不觸火溫身熟食若觸火者火則燒身身既被燒溫食無用四門本通般若除煩惱辦大事若取著者則成邪見燒於法身法身既燒四門通何等若不觸火門則能通也若以佛教爲門者教略爲四云若於一教以四句詮理即是四門四四合爲十六門若以行爲門者稟教脩觀因思得入卽以行爲門藉教發真則以教爲門若初聞教如快馬見鞭影卽入正路者不須脩觀若初脩觀如夜見電光卽得見道者不更須教竝是往昔善根習熟今於教門得通名爲信行

於觀門得通名法行若聞不即悟應須修觀於觀悟者轉成法行若脩觀不悟更須聽法聽法得悟轉名信行教即爲觀門觀卽爲教門聞教而觀觀教而聞教觀相資則通入成門教觀合論則有三十二門此語其大數耳細尋於門實有無量五百身因三十二不二門善財遊法界值無量知識說無量教門無量觀行如喜見城千二百門實相法城豈唯一轍經云說種種法門宣示於佛道今且約四教明十六門相三藏四門者初明有門謂生死法本非世性微塵父母所作乃是無明正因緣法出生諸行煩惱業苦三

道悉皆是有切有爲無常苦空無我能發得煩頂世第一法發真無漏因用真脩道此則道諦亦是有子果旣斷得有餘無餘涅槃故大集云甚深之理不可說第一實義無聲字陳如比丘於諸法獲得真實之知見此則因滅會真真亦是有此是諸阿毗曇論之所申見有得道卽有門也二空門者卽是彼教析正因緣無明老死苦集二諦三假浮虛破假實悉入空平等發真無漏因空見真空卽第一義之門也故須菩提在石室觀生滅無常入空因空得道見佛法身恐此是成實論之所申也三明有空門者卽是彼

教明正因緣生滅亦有亦空若稟此教能破偏執有無之見見因緣有空發真無漏因有無見真有無卽是第一義之門也此是迦旃延因門入道故作毘諦論還申此門也四非有非無門者卽是彼教明正因緣生滅非有非無之理若稟此教能破有無邊邪執見見因緣非有非無發真無漏因非有非無見真非有非無卽第一義之門也惡口車匿因此入道未見論來有人言犢子阿毗曇申此意彼論明我在第五不可說藏中我非三世故非有我非無爲故非無我此恐未可定用也二明通教四門相者此是摩訶衍

門通通通別不可偏取今約通通論四門者上三藏四門皆滅色入空如析實人頭等六分求人不得故名爲空通教四門皆卽色是空如觀鏡像六分卽空不待析盡爲空大論云佛告比丘觀空卽疊觀疊卽空此是體門異析門也三藏觀生空得道三藏觀生空得道已又更觀法空生法二境不融今通門生空卽法空法空卽生空無二無別大品云色性如我性我性如色性此二皆如幻化有人言三藏破計實性約實法求我不得但是觀性空大乘明相自性是空不須檢已爲空此乃一往之言大品云常性空無不

性空時曉了諸法如幻化水月鏡像豈止相空而已  
祇約此幻化卽判四門論云一切實一切不實一切  
亦實亦不實一切非實非不實佛於此四句廣說第  
一義悉檀一切實爲有門者若業若果善惡等法乃  
至涅槃皆幻化譬鏡中像雖無實性而有幻化頭等  
六分爲有門也諸法旣如幻化幻化本自無實無實  
故空乃至涅槃亦如幻化如鏡中像假有形色求不  
可得是爲空門諸法旣如幻故名爲有幻不可得故  
名爲空如鏡中像見而不可見不可見而見是亦空  
亦有門幻有尚不可得況復幻空而當可得卽是兩

捨爲門是通教卽空之一四門也若三乘共稟而根性  
不同各於四句入第一義故此四句皆名爲門故青  
目注論云諸法實相有三種今是三乘人同入此門  
見第一義者是卽空之一種也三明別教四門者若  
用中論偈亦名爲假名也而辨四門者卽如大論四  
句亦是此四句意所言別者下異藏通有七義故別  
上異圓教又歷別入中故言別此意正出大經但多  
散說今約乳等喻卽顯別四門也文云佛性如乳有  
酪石中有金力士額珠卽是有門若明石無金性乳  
無酪性衆生佛性猶如虛空大般涅槃空迦毗羅城

空卽是空門又云佛性亦有亦無云何爲有一切衆生悉皆有故云何爲無從善方便而得見故又譬乳中亦有酪性亦無酪性卽是亦有亦無門也若明佛性卽是中道雙非兩遣又譬乳中非有酪性非無酪性卽是非空非有門別教菩薩稟此四門之教因見佛性住大涅槃故此四句卽是別教之四門一往用擬別門經文或時爲圓門此義在下料簡云圓教四門相者此門明入佛性第一義一往與別門名義是同細尋意趣別有多途分別同異在下委論云二示入門觀卽爲二先略示入門處二略示入門觀略

示入門處者能通教門大爲十六所通之理但是偏圓兩真前入門同入偏真後入門同入圓真何故偏真理一門八耶三藏四門糺迴隘陋名爲拙度通教四門是摩訶衍寬直巧度門有巧拙之殊能通爲八真理無二所通唯一譬如州城開四面門四面偏門以譬三藏四面直門以譬通教偏直旣殊能通爲八使君是一所通不二也別教四門偏而未融圓四門圓而且融偏圓旣殊能通爲八圓真不二所通唯一譬如帝城開四面門四面偏門以譬別教四面直門以譬圓教偏直旣殊能通爲八帝尊不二所通唯一

云

法華經疏卷之十一

五

問小乘一種四門摩訶衍何故三種四門答小乘淺近一生斷結喻如小家大乘深遠通處則長譬如今大家須千門萬戶也三四何足爲多耶問摩訶衍門那得三人見真答此門正意通大傍通於小譬如王國有通門別門別門通朝士通門通朝市不可以民庶登踐謂爲民門摩訶衍通門亦如是正通實相傍通真諦故三乘灰斷兼由此門不可以兼通偏真而名小乘門也二略示入門觀者先明三藏有門觀彼有門中具於信法信行聞說卽悟此心疾利得道方法難可示人且約法行觀門卽爲十意一識所觀

境二真正發心三遵脩定慧四能破法偏五善知通  
知塞六善用道品七善用對治八善知次位九善能  
安忍十者法愛不生阿毗曇中具此十意其文閒散  
論師設欲行道不知依何而脩如惑歧路莫識所從  
今撮其要意通冠始終則識有門入道之觀也一明  
所觀境者卽是識正無明因緣生一切法也若謂世  
間苦樂之法從毗紐天生或言從世性生微塵生皆  
邪因緣生若言自然法爾無誰作者此無因緣生無  
因緣生是破因不破果邪因緣亦是破正因果是等  
悉非正因緣境所不應觀數存隣虛論破隣虛此與

邪無相濁始非正因緣境何者隣虛有無未免二見  
猶是無明顛倒故是集集故感麤細等色無明顛  
倒既其不實所感苦果報那得定計有無故大論云  
色若麤若細總而觀之無常無我無我故無主若麤  
若細若因若緣若苦若集若依若正皆無常無主悉  
是無明顛倒所作如阿毗曇門廣說是名識正因緣  
所觀之境不同外道邪無因緣也二發心真正者既  
識無明顛倒流轉行識乃至老死如旋火輪欲休息  
結業正求涅槃發二乘心出離見愛不要名利但破  
諸有不增長苦集唯志無餘其心清淨不雜不僞此

心真正名正發心不同外道天魔也三遵脩定慧者  
行人旣誓求出有依波羅提木叉住脩道但罪障紛  
馳心不得安道何由剋爲脩四念處學五停心破五  
種障五停事觀卽是定定生念處卽慧慧定均停故  
名安心又定慧調適故名停心若無定慧若單定慧  
若不均調定慧皆不名賢人如世間賢人智德具足  
智則靡所不閑德則美行無缺許由巢父乃可稱賢  
若多智寡德名狂人多德寡智名癡人狂癡皆非賢  
也賢名賢能亦名賢善善故有德能故有智智德具  
足故稱賢人行者亦爾脩四念處慧學五停心定定

慧具足云何數息具足定慧制諸覺散從一至十知  
息及數無常生滅念念不停又若觀不淨當深厭穢  
惡能觀所觀無常生滅速朽虛誑詭諸衆生厭觀起  
恚須慈定相應見他得樂亦知此定及彼樂相無常  
生滅因緣觀時橫觀四生悉是因緣生法豎觀三界  
亦是因緣生法從緣生者悉是無常無我諸障起者  
應須念佛亦如是是名五停具脩定慧有定故不狂  
有慧故不愚依此安心爲衆行基址發生煩頂入苦  
忍真明隣聖爲賢義在於此不同外道不知鑽搘漿  
猶難得況復酪蘇等也四破法徧成見有得道其安

心定慧若五停心後脩共念處時帶不淨等徧破諸  
法事理悉成若五停心後單脩性念處時一向理觀  
以無常之慧徧破諸見破見之觀如中論下兩品所  
明也佛初轉法輪不說餘法但明無常徧破一切外  
道若有若無乃至非有非無神及世間常無常等六  
十二見使得清淨今阿毗曇師受他破云無常是小  
乘常是大乘常得破無常無常不得破常若得前意  
此不應然未得道前執心所計常無常亦常亦無常  
非常非無常等法塵對意根而生諸見見從緣生從  
緣生者悉是無常云何外道有常樂我淨如是四倒

悉用無常破之故五百比丘語達堯言但脩無常可以得道可以得通如六羣比丘爲他說法純說無常當知見無深淺悉爲無常所破不同舊醫純用乳藥也五知通塞者前雖偏破諸見之過未見其德過卽是塞德卽是通若有見中八十八使乃至非有非無不可說見中八十八使悉從緣生名之爲塞塞故須破復識其通者所謂有見中道滅乃至非有非無不可說見中道滅如是道滅從因緣生名之爲通通何須破若不識諸見謂是事實餘妄語執見成業愛潤因果豈非塞耶能於諸見一一皆知無常顛倒不生

計著不執則無業無業則無果如是達者則有道滅豈不名通不同外道如蟲食木是蟲不知是字非字也六善脩道品者豈唯識此通塞而已當脩道品進諸法門謂觀此有見乃至不可說見皆依於色汗穢不淨卽身念處若受有受乃至受不可說受皆依三受受卽是苦名受念處觀於諸見所起想行悉是無我名法念處觀諸見之心念念無常名心念處觀此四觀名有爲法中得正憶念得是念故四倒則伏是名念處勤脩四觀名四正勤定心中脩名四如意五善根生故名五根五根增長遮諸惡法故名五力定

慧調停名七覺分安隱道中行名八正道今非約位  
道品但就通脩論三十七耳若一停心門作三十七  
品餘停心亦如是阿毗曇道諦中應廣分別云云此  
三十七品是行道法將至涅槃城有三門所謂苦下  
二行為空解脫門集道各四苦下有二是無作解脫  
門滅下有四是無相解脫門若涅槃門開卽得入也  
故佛於須跋陀羅經中決定師子吼唯我法中有八  
正道外道法中尚無一道何況八道耶七善脩對治  
者若利人卽入若不入者當脩助道故論云十二禪  
等悉是助開門法正慧既弱遮障得起脩助道爲援

論云貪欲起教脩不淨背捨等緣中不自在當教勝  
處緣中不廣普當教一切處若少福德當教無量心  
若欲出色當教四空如是等悉是助道助開門法不  
同外道於根本禪起愛見慢也八善識次位者雖脩  
如此正助等法不得卽言我是聖人叨濫真似不識  
賢聖今明識真似階差自知非聖增上之慢則不得  
生不同外道戒取見取計生死法以爲涅槃也九善  
脩安忍別相念處力弱未甚通泰轉脩總相念處或  
一總二乃至總四是時應須安忍使諦觀成就轉  
入煥法似道煙生大經云煥雖有漏有爲還能破壞

有漏有爲我弟子有外道則無又若安忍卽成頂法頂法成名忍到傍邊如其不忍則退還此邊故云頂法退爲五逆煩法退爲闡提是故此中善須安忍內外諸障不同外道不能安忍細微遮法也十法愛不生者上來旣得四善根生若起法愛雖不退爲五逆闡提而不得入見諦是則三番縮觀進成上忍世第一法發苦忍真明十六剎那得成初果或成超果或重用觀斷五下五上得成無學若利人用觀節節得入若鈍用觀具來至十阿毗曇中雖復廣解不出十意五百阿羅漢作毗婆沙正申有門得道云何而言

是調心方便四門調適俱能得道若生取著俱不得道若但云見有得道見空不得道云何異於外人故大論云若不得般若方便則墮有無今以十法爲方便直入真門札異外道也是爲有門入真之觀也餘空門亦空亦有門非空非有門入真之觀始終方便比於有門各各不同然俱會偏真斷三界惑更無異也其三門準有例應十觀大同小異可以意得今不能煩記一云次明通教有門觀者例爲十意列名二云體解諸法皆如幻化三人發心雖同亦有小異三云中論師云此中是大乘聲聞今言非也經云欲得

聲聞緣覺當學般若論云聲聞及緣覺解脫涅槃道皆從般若得經論不云是大人師謬耳雖知定慧不可得而安心二法以幻化之慧徧破四見六十二見及一切諸法知幻化中苦集名爲塞知幻化中道滅名爲通以不可得心脩三十七品以無所治學諸對治識乾慧地乃至佛地幻化之慧不爲外魔所動內障所退諸法不生而般若生亦不愛著卽得入真若智若斷無生法忍比前爲巧準作可知不復委記餘三門十意大同小異可以意得亦不煩記文也次明別教有門觀卽爲十意云一觀境者超出凡夫四

見四門外亦非二乘四門法亦非通教四門法諸四門法爲境不名實相非生从涅槃如來藏者乃名爲妙有有真實法如此妙有爲一切法而作依持從是妙有出生諸法是爲所觀之境也二明發心者菩薩深觀實相妙有不爲生从所遷金藏草穢額珠鬪沒貧窮孤露甚可愍傷菩薩爲此起大慈悲四弘誓願思益有三十二大悲華嚴云不爲一人一國一界微塵人乃爲法界衆生發菩提心如是發心有大勢力如師子吼旣發心已安心進行如前所說種種定慧如是時中宜應修如是定如是時中宜應修如是慧

定愛慧策安心修道依止二法不餘依止是爲安心  
法也還以妙有之慧徧破生死一切諸見六十二等  
功德黑闇皆悉不受徧破涅槃沈空取證猶如大樹  
不宿怨鳥於一一法中明識通塞如雪山中備有毒  
草亦有藥王菩薩須知如此心起即是六道苦集名  
爲塞如是心起卽是二乘道滅名爲通又如是心起  
是一乘苦集名爲塞如是心起是菩薩道滅名爲通  
如是心起名爲菩薩苦集如是心起名佛道滅於苦  
集中能知非道通達佛道能知佛道起於壅塞了了  
無滯是爲識通塞善脩道品者夫三十七品是菩薩

寶炬陀羅尼破倒念處勤行定心五善根生能排五  
惡定慧調適安隱道中行離十相故名空三昧亦不  
見空相名無相三昧不作願求名無作三昧是行道  
法近涅槃門若脩諸法對治之門所謂常無常恒非  
恒安非安爲無爲斷不斷涅槃非涅槃增上非增上  
常樂觀察諸對治門助開實相也從初十信十住十  
行十迴向十地等覺妙覺聖位深淺悉知無謬終不  
謂我叨極上位內忍善惡兩覺違從二賊外忍八風  
以忍力故不爲傾動設證相似之法法愛不起不墮  
菩薩頂生名法愛無是愛故卽入菩薩位破無明穢

草顯出妙有金藏得見此住入於實相是爲有門脩入實觀也餘空門亦空亦有門非空非有門入實觀例亦爲十諸門方便雖各不同俱會圓真理無差

二三門觀法準有可知不復委記

云

云

而空無門也如門十旨十五上  
則安非安爲無能攝不禪且達非異業普上非  
起異業門者前達之性皆當無常即非  
無常時又無時三相不外離不合無非三相不  
離又無時故安無中行轉十時諸谷空

妙法蓮華經玄義卷第八下

王正善